

Tutu Nì Tiaa Iin Nèhivì xí Dios nùù Nècuàchì Hebreu

Nì quixi Dèhemanì Dios, nì cachitnùhu-ya xì nèhivì ñuhivì ñà-nduú palabra xi Yua-yá

¹ Sàhana na cuní Dios càhàn-yà xì xii-ndà, nìsa techuún-yá iin nèhivì ñà-cachitnùhu-ne xì nècuàchìmà palabra xi-ya. Cuàhà gá xichi nì quida-ya ducán, te cuàhà gá ejemplu nìsa xichuún-yá na ní cachitnùhu-ya palabra mà. ² Doco quivì vichi na cuàhàn xinu tiempu, Dèhemanì-yá nduú ana nì techuún-yá càhàn xii-ndà. Vàchi sàhà ndahà fuerte Dèhemanì-yá nì quidavàha-ya nsidanicuú ñuhivì iá, te nì chitnùnì stná ini-yà ñà-divi Yà-mà cunduu ana nihitàhvi dandacú sàhà nsidaámà.

³ Cunaha-nsiá, nacua ndiaha gá mii-yá, ducán ndiaha stná Dèhemanì-yá, na ian nduà-yá nduú Yà-mà, vachi iin-ni nacua iá-yà, divi ducán iá stná Yà-mà. Te Yà-mà, sàha-ñá fuerte dandacú ndiaha-yá, ñàyùcànduá quidáchúûn ví nsidanicuú ñà-iá ñuhivì. Te na ní nsihì nì nsidandoo-ya cuàchi-nda, dandu mànuhù-yá ansivi, te nì sàcòo-ya ladu cuàhá Yuandiáhà-yà.

⁴ Ñàyùcànduá, chicá más ndiaá-yà nùù nsidaa ángel, vachi nì chitnùnì ini Yuamáni-yá ñà-cachi-ndà xì Jesús Dèhemanì-yá, te ñà-yòhò nduú ñà-chicá ndiaá nùù nsidaa ñà-nduá cachì-ndà xì iin ángel. ⁵ Vachi còò ni-iin ángel nì nihitàhvi cachi Dios xii-né dohó: Dèhemanì' nduu-ní: vichi sà-itàcù-ní nì quide.

(Còò, có-càchí-yà ducán xì ni-iin ángel.)

Daaní, inga xichi dohó nì cachi stná-yà (sàhà Jesús):

Na quidá iin yua, ducán icúmí quide xì mii-yá; te mii-yá, na iin dèhi cunduu stná-yà nùí.

(Ni cónì cachi Dios ducán xì ni-iin ángel.)

⁶ Daaní, nì chitnùnì stná ini-yà quesaa Dèhemanì-yá ñuhìvì yohó, te quìvì nì cuu ducán, dandu nì cachi-yà (xì nsidaa ángel xi-ya):

Nsidaa nsiohó ana nduú ángel xi, icúmí-ndâ cahvi-ndá Dèhemanì' yohó.

⁷ Doco na ní càhàn-yà sàhà ángel mà, dohó nì cachi-yà:

Nì quidavàha-ya ángel xi-ya (ñà-cacanuú yàchì-nè) nahi tàchì; vàchi nahi mozo xinúcuáchì nùù-yá nduú-né (sáha-ne castigu xi-ya) nahi ñuhu xíxìn.

⁸ Doco na ní càhàn-yà sàhà Dèhemanì-yá, dohó nì cachi-yà:

Dios nduu-ní, te nicanicuahàn icúmí-nì cusahnu-ní; te micúsi modo viì icúmí-nì dandacu-ní nùù nèhivì. ⁹ Cuú ndisa inì-ní sàhà nsidaa ñà-íá viì, doco có-cuú dahuun inì-ní ni-iyuhu sàhà cuàchi. Ñàyùcàndùá, nùù mii-yá ana cahvi-ní sàni ñhìtáhvi-ní ñà-cudiì cuáhà inì-ní; cunaha-ní, chicá icúmí-nì cudiì inì-ní nùù nsidaa gá ana cutnâhâ xí-ní.

¹⁰ Daaní, (inga xaan nacání nansa nì cachi stná nèhivì na càhàn-nè xì-yá):

Stoho-nsì Señor, sànaaha nì quidavàha-ní ñuhìvì. Ndhà mii-ní nì cuàha stná nsidaa sìtnùù itándiaa ansivi. ¹¹ Te mate nsidaájàn icúmíâ

nsiha, doco mii-ní, còó; nicanicuahàn icúmí-nî coo-ní. Nsidaa ñà-íá ñuhiví, icúmíâ ndutuhá`, na ian sìcoto. ¹²Te na ian nacáhnù vii nèhiví iin dùhnù-né, ducán icúmí-nî quida-ní xì ansivi, vèchi icúmíâ nadàma, na ian nadama-nda ñà-ndìxì-ndà. Doco mii-ní, còó. Iin-ni icúmí-nî coo-ní; mà nunca sàà quivì ndañuhu-ní, nì cachi-nè.

¹³ Doco Dios, cóni càchí-yà xì ni-iin ángel palabra yohó; (cuisì mii Dèhemanì-yá nì cachi xì-yá dohó): Yohó coo-ní ladu cuahí` ndè cachi sàà cundeí nùù nsidaa ana xiní ùhì xì-ní; dandu cusahnú fuerte-ní nùù-né, nì cachi-yà.

¹⁴ Vèchi ángel, ináhá-ndá ñà-cuisì espíritu vii xinúcuáchí nùù Dios nduú-né; ndacú-ní nùù-né ñà-cacanu-ne cunucuachi-né nùù-yá, te chindee-né nsidaa ndohó nèhiví icúmí càcu anima-xì.

2

Màsà nunca nandòdó-nda gracia xi-ya ñà-cùnì-yà dacácu-ya anima-nda

¹ Sàhà nsidaájàn, cuàhà gá xiñuhu cunihnu vaha ini-nda razón ndiaha sàni xinitnùhu-nda, còtó cueé-ni cueé-ni tùcù-nda inga ichì. ² Vèchi ley sàhana, mate cuisì ángel nduú ana nì cachitnùhu xi-nda sàhà-ñá, doco fuerte nì sandiaa stná, te nècuàchì cóni ndúlócò sàhà-ñá, iin castigu cahnú nì nihì-né nacua ndíá icà cuu xi nsidaa nèhiví có-iníní. ³ Ñàyücàndüá, ndohó nècuàchì (tiempu vichì), ¿nansa cui càcu stná-nda nú màsà quíhín casu-nda sàhà palabra ndiaha cachí nansa càcu-nda? Vèchi divi Stoho-nda Señor nduú ana primeru nì cachitnùhu palabra mà, dandu después nì xinitnùhu

stná ndohó nì quida nèhivì nì inini nì càhàn mii-yá. ⁴ Te nì chindee stná Yua-nda Dios sàhà-ñá cundaà ini-ndà divi ñà-ndàà nduámà, vàchi nì quida-ya nsidanuu clase milagru ndiaha, te nì sàhatahvì stná-yàndó Espíritu ìì xí-yá; (te vichi) cuàhà gá ñà-ndiaha ìì quidá Espíritu ìì sàhà-ndà segùn nansa cuní Yua-nda Dios.

Nansa nì nanduu Jesús nahi nèhivì, te ducán nì nìhì-yá nansa dacácu-yàndó

⁵ Cunaha-nsiá, sàni cachì xì-nsiá sàhà inga ñuhivì vàxi xi-nda. Doco màdì ángel cunduu ana cusahnú nùá, vàchi cóni chítñuní ini Dios ducán. ⁶ Nùu tutu ìì iá ndé nì càhàn iin nèhivì (xì-yá), te dohó nì cachi-nè:

Nèhivì ñuhivì, có-ndiàá guâ-nè, doco nihnú inì-nínè. Còo necesidad icúmí-nì ñà-nsinuu ini-ní nèhivì ñuhivì, doco divi nduá quida-ní. ⁷ Te sàni chitñuní stná inì-ní ñà-sàhà sacu quivì mà-sàà nèhivì ñuhivì ndudava-ne xì ángel xi-ní. Te nì nìhítàhvì stná-nè cuàhà gá tñùñuhu ndiaha nì quida-ní. Te nì chitñuní stná inì-ní ñà-cusahnú-né nùu nsidaa ñà-ndùá nì quidavàha-ní. ⁸ Nsidanicuú iñàha, vètùni dandacú-né nùá nì quida-ní. Ducán cachá`.

Pues nú ducán sàni nìhítàhvì nèhivì quida-ne, dandu nsidanicuú iñàha, mà cúí ndòo uan iladu, fuerza icúmí-nè dandacú-né nùu nsidanicuú iñàha. Doco quivì vichi nàhà xicà, tãñàha ga sàà quivì dandacú ndisa-ne nùu nsidaa ñà-jaàn. ⁹ Doco Jesús, ndisa, sàni cundaà vaha ini-ndà sàhà mii-yá, cuàhà gá tñùñuhu ndiaha sàni nanihì-yá. Vàchi sacù-ni quivì cóni ndúdává-yá xì ángel, doco

sàhà gracia xi Dios nì ndoho-ya, te nì xihì-yà sàhà nsidaa-nda, te sàháyùcàndùá nì nanihì nsihí-yá tnùñuhu ndiaha xí-yá.

¹⁰ Dios nduú ana nì quidavàha xi nsidanicuú ñà-íá. Te sàhà ñà-nì còó más tnùñuhu xí-yá, ñàyùcàndùá nì sàcòo nsidaámà. Doco cuní stná-yà cundoo cuahà dèhe-ya gloria xi-ya. Ñàyùcàndùá, nì chitnùní ini-yà ñà-ndoho Jesús, vèchi ducán nduá xiñuhu cuu xi-yá sàhà-ñá ni cuácátnáhâ nsidaa ñà-nduá icúmí cuu xi-yá. Ñàyùcàndùá, sàhà-ñá nì ndoho-ya ducán, ñà-jaàn nì nihì-yá salvación xi-nda. ¹¹ Te cunaha-nsiá, mate divi-ya nduú ana ndiaha dandúhî xì anima-ndà, doco iin-ni Yuamánì-yá icúmí-yâ nahi ndohó. Sàháyùcàndùá có-cùcáhán núù-yá cachi-yà xì-ndà ñà-nduù-ndà nahi tnaha-ya. ¹² Vèchi (núù tutu ìì) dohó cachi-yà (xì Yuamánì-yá):

Na natácá tnahi, dandu icúmî nacani xì-né (ñà-ndiaha guá) íá-nî, te coto stnài alabanza núù-ní, cachí-yà.

¹³ Daaní, inga xaan cachí stná:

Yùhù icúmî cahvi xì mii-yá.

Te inga xaan cachí stná:

Cundehè-nsiá, yohó íá stnài xì nèhivì nì chitnùní ini Dios cunduu (nahi) dèhi.

¹⁴ Pues sàhà-ñá nduu-nda dèhe-ya, te íá iquìcúñú-ndà, ñàyùcàndùá stná mii-yá, nì nihì stná-yà iin iquìcúñú (nahi ndohó), te ducán nì nihì-yá nansa cui-yà. Ñàyùcàndùá, sàhà-ñá nì xihì-yà, vètùni nì cundee-yá núù ñà-malu, vèchi quisi jaàn nìsa dandacú sàhà-ñá cui nèhivì ñuhiví.

¹⁵ Te nèhivì, yúhî sàstnùhù-né cui-nè, ñàyùcàndùá,

mà úhì dandacú-si nùù-né inii vida xi-ne. Doco vichi (sàhà-ñá nì cundee-yá nùù-sí), vátùni cuidahan-yándô nùù ndahà-sí. ¹⁶ Vàchi màdì ángel nì cùhí ini-yà na ní quixi-ya ñuhìví yohó; còó. Divi ndohó nècuàchì descendencia xi Abraham nì quixi-ya nì chindee-yá. ¹⁷ Ñàyùcànduá nì xiñuhu nanduu-ya iin tiàa; meru nacua ndáa nèhivì ñuhìví yohó, ducán nì nanduu-ya, na iin tnaha-ne. Te sàhà ñà-jaàn vátùni nì sàcùnduu stná-yà nahi dùtù xi-nda nùù Dios, vátùni cahví-nda xi-yá ñà-cundehè ndàhvì-yàndó. Te sàhà stná nì nanduu-ya iin tiàa, vátùni nì dànáa-yá sàhà cuàchi-nda, te ducán mà níhì gá-ndà castigu sàhà cuàchi-nda. ¹⁸ Te sàhà-ñá nì yàha stná-yà cuàhà vida na ní ndoho guá-yà, ñàyùcànduá vátùni chindee stná-yàndó na quivì yáha stná-ndà tnùndoho.

3

Chicá ndiaá Jesús nùù Moisés mate ndahà nècuàchìmà nì quixi ley sàhana

¹ Cunaha-nsiá, iin-ni xínduu-nda nèhivì ìì xí Dios, te iin-ni sàni cana stná-yàndó ñà-sàa-ndà gloria xi-ya, ñánì. Ñàyùcànduá, sàhà nsidaájàn nicanicuahàn xiñuhu cunihnu vaha ini-ndà Jesús, vàchi mii-yá nduú ana cahvi-nda, te divi stná-yà nduú ana nì techuún Dios ñà-quixi nùù-ndà, te nì sàcùnduu-ya dùtù xi-nda. ² Te na ní techuún Dios-yà quixi-ya, dandu nì quida ndisa-ya cumplir nsidaa ñà-nduá nì sàcùnaha-yá, nacua nì quida stná Moisés sàhana na ní sandiaa-nè nèhivì xí-yá. ³ Doco chicá más tnùñuhu icúmí Jesús nùù Moisés mà. Vàchi ducán nduá na ian cuáha iin vehe,

cuisì tñùñuhu xí ana nì quidavàha xán nduá queé, màdì tñùñuhu xí miá. ⁴ Te iin iin vehe, iá ana nì quidavàha xán, doco nsidanicuú ñà-íá ñuhiví, cuisì Dios nduú ana nì quidavàha xán. ⁵ Ñàyùcàndùá, ducán nìsa quida viì Moisés sàhana, nì sandiaa-nè nèhivì xí Dios na iin nècuàchì xinúcuáchí (nù-yá); te chuun xi-ne nì sanduu stná ñà-cáhàn-nè sàhà palabra icúmí Dios datú-ya después. ⁶ Doco Cristu, (tucu iá xì mii-yá, vàchi) Dèhemanì Dios nduú-yá. Te quidá víi stná-yà (nahi Moisés), doco chuun xi-ya nduá ñà-dàndàcú-yá nùù nsidaa nèhivì xí Yuamánì-yá. Te divi nèhivì xí-yá sàndùú stná ndohó nú màsà yúhî-ndà, te iin-nì ni cúdî ini-ndà cahvi-nda xi-yá dècuèndè na sàà xìnu tiempu.

Nansa sàà nèhivì xí Jesús ndé ía descansu ndiaha xí-yá

⁷ Ñàyùcàndùá, xiñuhu quida-nda nacua cachí Espíritu ìì xì-ndà nùù tutu ìì ndé cachí-yà:

Vichi sacúndáhvî nùù-nsiá ñà-nì cúnínì-nsiá ñà-nduá dandacú Dios. ⁸ Màsà quídámáxìní-nsiá na ian nìsa quida xì-nsiá sàhana na ní xìca-ne yucù daná. Cuàhà gá nì dàcuídà ini-nè yùhù, ndè nì nanduu-ne nahi contra xi. ⁹ Te ùì dico cuià nì xini nècuàchìmà milagru ndiaha nì guide xì-né; doco còó, iin-ni nì quida canúú-né (ñà-nduá dàcuídà ini xì). ¹⁰ Ñàyùcàndùá, yáha ga nì cuduchi inì sàhà nsidaa-né, te nì cachi: “Cutu cuní nècuàchìmà tucù-nè inga ichì; mà túha-ne cunchicùn vii-né ichì”. ¹¹ Ñàyùcàndùá, nì xidà ini; ndee ní cachi xì-né palabra yohó, te mà dámíà: “Mà

nunca cuàhi yàha-ne (lugar ndiaha xí) ndé cundoo-ne descansu nì cùí”. Ducán nì cachi Dios.

¹² Ñàyùcàndùá, cuidadu ni cúndóó-nsiá ñàni, còtó coo iin-nsia nacání chicuéhè ini-xi, te nandòdó-nsiáyà, có-xiníndísá gá-nsiàyà, mate Dios iá nicanicuahàn nduú-yá. ¹³ Sàhájàn nsìquívì xiñuhu nacuàhandee stnahá ini-ndà, mientras iá va tiempu vichi, còtó sàà-ndà cunduu-nda nècuàchì quidámáxìní, vàchi mà úhì dandahví cuàchi-nda ndohó, te cuu xi-nda ducán. ¹⁴ Vàchi cunaha-nsiá, cuisì nú iin-ni ni cúnchícùn vii-ndàyá ndè xínu tiempu, te cunihnu vaha ini-ndàyá nacua nì quesaha-nda, dandísá sàà-ndà nihítáhvi-ndà cundoo-nda nùù Cristu.

¹⁵ Ñàyùcàndùá, dohó cachí-yà (nùù tutu ìì):

Vichi sacúndáhvi nùù-nsiá ñà-nì cúníní-nsiá ñà-ndùá dandacú Dios. Màsà quidámáxìní-nsiá na ian nisa quida nècuàchì sàhana, te cuàhà gá nì dàcuídà ini-nè yùhù, cachí-yà.

¹⁶ Te ¿índù nèhivì nduú nècuàchì nì inini xi (palabra xi-ya), te después nì cahíchì ini-nèà? Pues divi nsídaa nècuàchì nì tavà Moisés ñuu Egipto yucán.

¹⁷ Te ¿ana divi nduú nèhivì nì cuduchi guá ini Dios sàhà-xí inii ùì dico cuà mà? Pues, divi nècuàchì cuàchi ma, te ñàyùcàndùá dísàhà-xí nì xihì-nè yucù dàná mà. ¹⁸ Te ¿amádi divi-ni stná-nè xínduu ana nì càhàn ndee guá-yà sàhà-xí ñà-mà yàha-ne lugar xi-ya ndé nihì-né descansu nì cùí? Pues jaan, vàchi nècuàchìmà, cóni cúní-nè cunini-neyà.

¹⁹ Ñàyùcàndùá, vètùni cundaà ini-ndà, divi

sàhà-ñá cóni cùnì-nè cunindisá-né, ñàyùcàndüá màni cùí yàha-ne (lugar ndiaha ma).

4

¹ Doco cunaha-nsiá, vichi iá va nansa cui sàà-ndà lugar ndiaha xí-yá nacua nì cachi-yà xì-ndà. Ñàyùcàndüá, cuidadu ni cúndóó-nsiá còtó ndañuhu-nsiá ichì sàni tñii-nsia cuàhàn-nsià cundoo-nsia nùù-yá ducán. ² Vàchi nùù ndohó sàni cachitnùhu-ne ñà-ndùú razón ndiaha xí-yá davani nacua nì cachitnùhu stná-nè xì nèhivì sàhana ma. Doco mii-né, cóni níhì-né ni-iin provechu nùù palabra mà, vàchi mate ní xinitnùhu-ne, doco cóni xíníndísâ-né. ³ Doco ndohó nècuàchì xíníndísâ, vátùni sàà-ndà ndé iá descansu ndiaha ma, vàchi (mà níhitàhvi gá nècuàchì sàhana ma, vàchi) dohó nì cachi-yà:

Yùhù, nì xidà inì; ndee ní cachi xì-né iin palabra, te mà dámíà: mà nunca cuàhi yàha-ne (lugar ndiaha xí) ndé cundoo-ne descansu nì cùí.

Ducán nì cachi Dios, vàchi dècuèndè tiempu nì quidavàha-ya ñuhiví sàni xínu chuun xi-ya. ⁴ Vàchi nùù tutu ìi iá ndé cachí nansa (nì quida-ya) quivì ùsà; te dohó cachá:

Quivì ùsà nì quetatu Dios, vàchi sàni xínu nsidaa chuun nì quida-ya.

⁵ Daaní, iá stná ndé cachí stná-yà inga palabra yohó nùù tutu mà:

Mà nunca cuàhi sàà nècuàchì mà lugar ndiaha xí ndé cundoo-ne descansu nì cùí.

⁶ Pues (nàhà xicà) fuerza icúmí cundoo dava nèhivì lugar ndiaha ma, doco nèhivì nì inini xí razón ndiaha primeru mà, cóni níhì-né sàà-nè cundoo-ne yucán, vàchi cóni xíníndísâ-né. ⁷ Sàhà

ñà-jaàn nì cachi stná-yà inga palabra después: vātùni iá inga tiempu vaha, cachí-yà, divi nduú quivì vichi. Vàchi nì yàha inga caní tiempu, dandu nì tiaa stná Davíd inga palabra xi Dios. Divi nduú palabra làcà (nì tiaí nùù tutu yohó) ndé cachí-yà:

Vichi sacúndáhvî nùù-nsiá ñà-nì cúníní-nsiá ñà-ndúá dandacú Dios. Māsà quídámáxìní-nsià, cachí-yà.

⁸ Daaní, después nì sàà stná Josué (cusahnú-né nùù nèhivì sàhana ma, doco) ni sàhà mii-né cónì níhì nècuàchìma descansu ndiaha ma. Vàchi nú jaan, dandu mà cáchí Dios coo inga quivì (cui nihì-ndà descansu mà) después. ⁹ Doco divi sàhà ñà-jaàn vātùni cundaà ini ndohó ana nduú nèhivì xí Dios ñà-íá va iin lugar ndé cundoo-nda quetatu ndiaha-nda. ¹⁰ Vàchi cunaha-nsiá, nú sàni nihì-ndà descansu mà, dandu ñà-sàni nsihì chuun xi-nda (ñuhivì yohó) cundua, divi nacua nì ia stná xì mii-yá na ní xínu chuun nì quida-ya, nì quetatu-yà.

¹¹ Ñàyùcàndùá, xiñuhu ñà-cuàhandee ini-ndà sàà-ndà lugar ndiaha ma ndé nihì ndisa-nda descansu, còtó quida-nda nacua nì quida nèhivì sàhana ma, cónì xíníndísâ-né. ¹² Vàchi cunaha-nsiá, cahnú poder xi palabra ì xí Dios. Na ian itiacúa, teayùcàndùá (vātùni sàà yàchà ndè chicá ini anima-ndà) na ian nduá iin espada dìnn ndúi ladu-xi, doco palabra mà, chicá fuerteà nùù iin espada, vachi dècuèndè meru espíritu xi-nda sàà stná, xì dècuèndè stná chicá ini sàxínítnùnì-ndà. Te divi sàhà palabra mà vātùni cunahà claru nansa nacání ndisa ini-ndà, xì nansa nihnú stná ini-ndà quida-nda. ¹³ Cunaha-nsiá, còò ni-ìñàha cui coo dèhé nùù Dios; vachi nùù mii-yá túi

claru nsidanicuú ñàha, te indéhe stná-yà nsidaa ñà-nduá quida-nda, dandu después divi nùu mii-yá icúmí-ndá nacua-nda cuenta.

Jesús nduú dùtù ndiaha xi-nda

¹⁴ Dèhemanì Dios nduú Jesús, te vichi sàni nasaa-yà nùu Yuamáni-yá íá ansivi; dùtù ndiaha xi-nda nduú-yá vichi, ñàyùcànduá iin-ni ni cúnchícùn vii-ndà ichì-yá nacua sàquidà-ndà vichi.

¹⁵ Vàchi mii-yá, vètùnì cuhi ndisa ini-yàndó na yàha-nda tnùndoho, vèchi cuàhà gá ñàha sàni yàha stná mii-yá, doco cóni quidá-yá ni-iin cuàchi.

¹⁶ Ñàyùcànduá, màsà yúhì-ndà càcàn tàhvi-ndà nùu-yá, vèchi yucán íá-yà nùu silla ndiaha xí-yá ndé sáhatahvi-yá gracia xi-ya. Vèchi icúmí-yá cundehè ndàhvi-yàndó, te quida-ya gracia mà sàhà-ndà na meru xiñuhá.

5

¹ Nsidaa dùtù ñuhiví yohó, chuun nì nìhì-né nduá ñà-cáhàn-nè sàhà nèhivì nùu Dios, te dócò stná-nè promesa xi nèhivì nùu-yá. Stná promesa icúmí coco nùu-yá, icúmí-né cahmi stná-nè nsidaámà sàhà cuàchi nèhivì. ² Te sàhà-ñá nduú stná-nè iin ana iin-ni ndohó nahi ñanìtnaha-xi, vètùnì cuhi ini-nè nèhivì dava ga nú có-sàà nècuàchimà cundaà vaha ini-nè, te ò nú sàni quee-ne ichì váha. ³ Doco sàhà-ñá nduú stná dùtù mà nèhivì ùún, ñàyùcànduá icúmí-né cuàha stná-nè promesa sàhà cuàchi mii-né nacua quidá-né sàhà nèhivì dava ga.

⁴ Te màdì mii dùtù nácàxin-ne mii-né ñà-nìhì-né chuun ndiaha ma; còó. Cuisì Dios nácàxin xi-né, na ian nì quida-ya xì Aarón sàna. ⁵ Pues, ducánì stná

Cristu, màdì mii-yá nì càchí-yà cunduu-ya dùtù sàhà-ñá chiigá tavà-yá tnùñuhu xí mii-yá; còó. Divi Yuamánì-yá nì sàha xi-yá chuun ma, vàchi dohó nì cachi yàmà xì-yá:

Mii-ní nduu-ní Dèhemanì'; vichi sà-ìtiácù-ní nì guide.

⁶ Te divi ducán nì cachi stná-yà inga xaan xí tutu ì mà:

Nicanicuahàn cucumi-ní chuun cunduu-ní nahi dùtù, nacua iá chuun xi (dùtù sàhana nani) Melquisedec, nì cachi Dios.

⁷ Vachi (iin xichi) na iá va Jesús (ñuhivì yohó) nahi tiàa, dandu nì xicàn tàhvì fuerte-yà nù Yuandiaha-yá Dios, vàchi sàhà-yámà vètùni càcu-ya ñà-màsà cúí dahuun-ya. Cuàhà gá nì sacundahví-yà, dècuèndè nì sacu stná-yà; te sàhà-ñá nihnú ndiaha guá ini-yà, ñàyùcànduà nì cuhi ini Yuandiaha-yá mii-yá. ⁸ Cunaha-nsiá, mate meru Dèhemanì Dios nduú-yá, doco nì quida stná-yà tocar ndoho stná-yà sàhà-ñá cundaà vaha ini-yà nansa iá ñà-nchícùn-ndà nsidaa ñà-nduà nì ndacu nuù-yá. ⁹ Daaní, na ní nsihi nì ndoho-ya, dandu sà-íá, nicanicuahàn vètùni dacácu-ya nsidaa nèhivì iníní xí-yâ. ¹⁰ Vachi sàni cachi Yuamánì-yá ñà-mii-yá cunduu-ya dùtù chicá ndiaá, te quida-ya chuun xi dùtù na ian nìsa quida Melquisedec mà (sàhana).

Ndahví nsidaa nèhivì nacóó xí ichì Jesús

¹¹ Cunaha-nsiá, iá cuàhà gá ñà-cùní cachi xì-nsiá sàhà chuun yohó, doco ùhì chinahì mii-nsiá sàhà-ñá vichi, vàchi ùhì sàà-nsià cundaà vaha inì-nsiá, ¹² mate vichi sàni sàà tiempu ñà-chinaha mii-nsiá dava ga nèhivì nì cùí, doco còó, xiñuhu

î ñà-danácuáhâ gá nèhivi mii-nsiá ndè palabra chicá mà úhì xi-ya. Vâchi nahi ñà-cuati nduú-nsiá, nahi ana tà cútùha cuxi comida fuerte, nahi méè chichi î nduú-nsiá. ¹³ Vâchi nèhivì tà cútùha vii nansa cuní cachi palabra xi ichì váha-ya, nahi méè xínduu-ne, na ian tëndodo itiácù-va-ne. ¹⁴ Doco nèhivì sàni cutùha nacuni índù ichì nduú ichì váha, pues nahi nècuàchì sahnú xixí xi comida fuerte xínduu-ne, vâchi sàni sâhandee ínì-nè cutùha váha-ne índù-ñá iá váha, te índù-ñá có-íá váha.

6

¹ Ñâyùcàndùá, xiñuhu cunduu-nda nahi nècuàchì sahnú, te cutùha-nda palabra chicá nchichí xi Cristu, màdiá cuisì dàñùhù chicá sencillu cuni-hnu ini-ndà nicanicuahàn; còó. Màsà ndésáhá tú-ndá xí palabra primeru, vâchi sàni cundaà váha ini-ndà sâhà palabra mà, ináhá-ndá nacáníá nansa naxicocuñini ini-ndà sâhà cuàchi-nda ñà-còò chuan. Te sà-ináhá stná-nda nansa icúmí-ndá cunihnu váha ini-ndà Dios, ² xì nansa cuhì-nda, xì nansa chitàndòò-nda ndahà-nda dìni nèhivì (na xícàn tàhvì-nda sâhà-né). Te sà-ináhá stná-nda nansa icúmí nsìi natiacu-nè, xì nansa icúmí coo stná juicio final. ³ (Doco cumánì gá ñà-ndùá xiñuhu cundaà ini-ndà sâhà-xí.) Ñâyùcàndùá, cahnú gá Dios icúmí-ndá quida-nda seguir (ndè cachi ndu-fuerte fe xi-nda).

⁴⁻⁶ Vâchi nú sàni dàtnùù Dios sàxínítnùnì iin nèhivì, te después sàà-nè nacoò-ne (ichì ndiaha ma), dandu mà cúí gá sàà-nè naxicocuñini ini-nè inga xichi sâhámà. Vâchi sà-ináhá-nè nansa iá ñà-nìhìtâhvì ndiaha-nda nùù Dios, te sàni xini stná-nè nansa iá ñà-cucumi-nda Espíritu ìì xí-yá.

Ndè ináhá stná-nè ñà-ndiaha guá iá palabra ì xi-yá, te ini anima-nè sàni xini stná-nè milagru xi-ya nahi milagru xi inga ñuhívì vaxi xi-nda. Doco (ndahví-nè) nú sàni nacoo-ne ichì mà, vachi cuní cachàmà na ian nì nachituu-ne Dèhemani-yá nchìca cruz inga xichi tu, te nduú stná na ian sácùndiaa vate-néyà. ⁷ Ñàyùcàndùá, (ducán icúmí cuu xi nècuàchìmà nahi ejemplu sàhà) ñuhù xi-nda, vachi nú sàni cuun ndiaha dàvì, te nì ndèe cunú ndèhì, dandu (tuxí ini-ndà) cuàhàn cundiatú-ndà, ádi cuàha viì itu-ndà. Te divi ducání stná xi nèhivì. (Nú iin-ni nchícùn vii-né mii-yá), dandu vátùni cundiatú anima-nè. ⁸ Doco nú (nacoo-ne ichì-yá), dandu cunduu-ne nahi ñuhù ndé cuisì sahnú yùcù iñu, ò yùcù chicuéhè, vachi mà ndéè vaha-ne nùù-yá, te vichi sà-ítúú nhì-né iin castigu cahnú, te fin xi-ne cunduu ñà-coco-ne.

⁹ Doco tucu icúmí cuu xi mii-nsiá, ñani màní, ináhì, mate sàni cachì xì-nsiá ñà-nduá nì cachì. Vachi seguru icúmí mii-nsiá ñà-cundiatú anima-nsià, te càcu-nsia. ¹⁰ Vachi vaha Dios, te mà nándodó-yá obra sàni quida-nsia; ni mà nándodó stná-yà nansa cuú guá inì-nsia sàhà-yá, te sàhàmà nì chindee-nsiá dava ga nèhivì xi-yá; te dècuèndè vichi chindéé ì-nsiánè. ¹¹ Te nsiùhù, cuní-nsì iin-ni ni cúnsìhi inì-nsia quida-nsia ducán ndè quìvì último sàhà-ñá cucumi-nsiá seguru cuàhàn-nsià nhìtáhvi ndisa-nsia ñà-ndiaha ì ndiatu-nda. ¹² Màsà cúdúsán-ndá; còó. Iin-ni ni cúníndísá-ndá, te quida ndee ini-ndà nacua nìsa quida nèhivì sàni nhìtáhvi ñà-ndiaha ì nì cachi-yà xì-ndà.

Iin tñundé ini ndiaha icúmí nsidaa nèhivì xí Dios

¹³ Na ní saquin Dios compromisu xì Abraham sàhana, nì cachi-yà xì-né: “Yùhù chináhî mií”. Ducán nì cachi-yà, vèchi còò cá inga ana chicá ndiaá nùù mii-yá. ¹⁴ Te nì cachi stná-yà xì (Abraham) yucán: “Seguru icúmí cundiatú anima-ní quide; te cuàhà gá descendencia xi-ní icúmí cundoo”. ¹⁵ Ñàyùcànduá, ducán nì sandiatu cuéyàà nècuàchì mà dècuèndè nì sàà quivì nì nihì-né ñà-nduá nì cachi Dios xì-né.

¹⁶ Nèhivì ñuhivì yohó, nú cuní-nè caquin fuerte-nè iin compromisu, dandu ndácùcahan-né quivì iin ana chicá ndiaá nùù mii-né, (nahi Dios), te nú sàni chinaha-né mii-yá, dandu sà-ia, icúmí-nè nacahan-né Dios. ¹⁷ Ñàyùcànduá, na ní quida Yua-nda Dios comprometer ñà-icúmí-ndá nihìtáhvi-ndà ñà-ndiaha ì xi-yá, dandu nì ndacùcahan-yá mii-yá, vèchi cuní-yà cundaà vaha ini-ndà iin palabra mà-dáma nduá nì cachi-yà. ¹⁸ Ducán dandu ùi palabra nduámà, (dihna cuisì-ní nì cachi-yà, dandu después nì chinaha-yá mii-yá), ñàyùcànduá, nicanicuahàn icúmí cundiaa palabra nì cachi sahnú-yá mà; mà nunca dandahví-yándó, seguru icúmí coo tnùndé ini fuerte xi nsidaa ndohó nècuàchì cundéé inì-xi ñà-dacácu-yándó, te sàni cahvi stná-ndà xì consuelu ndiaha sáhatahvi-yá. ¹⁹⁻²⁰ Te consuelu mà, vètùni chindeá anima-ndà, vèchi có-nduá tnùhu; ñà-seguru nduá. Vèchi dècuèndè lugar ndé (chicá inì-xi vehe ì Dios ansivi), yucán sàni nansihvi Jesús, nì yaha-ya nùù ñà-sadí nihni nùù-ndà yucán, te dècuèndè lugar mà sáhatahvi-yándô tnùndé ini mà, vèchi dihna-ya nì sàà-yà yucán ñà-càhàn-yà sàhà-ndà. Vèchi vichi

sàni nìhì-yá chuun cunduu-ya dùtù xi-nda, te nicanicuahàn icúmí-yâ quida-ya chuun ma, divi nacua nìsa quida Melquisedec sàhana.

7

Nahi chuun xi dùtù nani Melquisedec, ducán nduú chuun quidá Jesús vichi

¹ Nècuàchì dandacú nùù ñuu Salem nì sanduu Melquisedec mà. Te nì sanduu stná-nè dùtù xi Stoho-ndà Dios, divi ana dandacú ndè chicá ansivi. Te divi-ne nì quee nì nanchìcùn ìchì xì Abraham na mándixi nècuàchìmà nì sàhàn-nè guerra nì cundee-né nùù cuàhà rey, dandu nì quee Melquisedec mà nì dàhí-ñánê. ² Te nì sàha nècuàchìmà-né diezmu sàhà nsidaa ñà-nduá nihí-né. Te quivì Melquisedec mà, cuní cachà “rey ndàcuisì inì-xi”. Te ñà-nduú stná-nè rey xi ñuu Salem yucán, ñàyùcànduá cuní cachi stná quivì mà “rey xi ndé iá paz”, vachi quivì Salem mà, cuní cachà “iá paz”. ³ Te cunaha-nsiá, còò (ndé nacání sàhà) yuadíhí-nê, ni (sàhà) yohòtéhè-né, ni nansa nì tùinuù-né, ni nansa nì xìhì-nè; ñàyùcànduá, ducán queámà na ian nicanicuahàn quidá-né chuun xi dùtù nacua quidá Dèhemani Dios.

⁴ Pues na cahnu-guá iá chuun nì nìhì Melquisedec sàhana ma, vachi dècuèndè stná yua raza-nda Abraham nì sàha xi nècuàchìmà diezmu, divi diezmu nì tavà-né nùù ñà-cuicà nì nìhì-né na ní sàhàn-nè guerra. ⁵ Daaní, después nì sàà iin tiàa nani Leví nì nìhì-né chuun ñà-cunduu stná-nè dùtù, mii-né xì descendencia xi-ne. Te nì sàcùnaha nsidaa-né tavà-né diezmu nùù ñanìtnaha-ne raza-nda nacua cachí ley ìì. (Ñàyùcànduá, ducán nì

quida-ne) mate iin-ni descendencia xi Abraham nì sanduu stná nsidaa ñanìtnaha-nemà. ⁶ Doco dùtù Melquisedec yucán, mate có-nduú-né descendencia xi Leví, doco dècuèndè nùù stná Abraham nì cutahvì-né diezmu mà, dandu nì dàhî stná-nè nècuàchìmà, mate (iin ana ìì gá nduú nècuàchìmà) ñà-nì saquin Dios iin compromisu xì-né. ⁷ Ñàyùcànduá, (chicá ìì Melquisedec), vachí ináhá vâha-nda, cuisì iin ana chicá ìì cui dahî xì inga nèhivì. ⁸ Te dùtù xínduu descendencia xi Leví, nèhivì ùún nduú-né, mà cútiácú-nè nicanicuahàn, doco tavá-né diezmu vichi. Doco tucu iá ñà-nduá cachí (tutu ìì) sàhà Melquisedec, vâchi ducán cáhàn mà sàhà-né (na ian) itiácú ìì-né. ⁹⁻¹⁰ Te mate vichi tavá descendencia xi Leví mà diezmu nùù nèhivì, doco tucu nduá nìsa quida-ne antes, vâchi como yohòtéhè Leví nduú Abraham, te nì dòcò-né diezmu nùù Melquisedec mà, ñàyùcànduá dècuèndè cui quida stná-ndà cuenta na ian stná Leví nì dòcò xì diezmu mà nùù nècuàchìmà na ní quee-ne nì sanchìcùn ìchì-né Abraham.

¹¹ (Ináhá-ndá), nì nìhì nècuàchì raza-ndà ley ìì xí Dios sàhà ndahà dùtù descendencia xi Leví. Te tnahà Aarón nì sanduu stná nsidaa dùtù mà. Doco siempre cumánì gá quee vii chuun nìsa quida-ne, ñàyùcànduá nì ndecunu inga dùtù, (divi nduú mii-yá). Doco có-quidá-yá na ian nìsa quida Aarón sànahà; còò. Na ian nìsa quida Melquisedec, ducán quidá-ya. ¹² Te ñà-sànì dama (Dios) modo quidá dùtù, ñàyùcànduá icúmí stná-yà dama-ya ley (nchìcùn nèhivì). ¹³ Vâchi Jesús nduú (dùtù saa) cáhàn-ndà sàhà-xí, te diín descendencia icúmí mii-yá; còò ni-iin yohòtéhè-yá nìsá quidáchúûn

nahi dùtù nùù mesa ìì xí Dios. ¹⁴ Vàchi ináhá-ndá, divi tiàa nani Judá nduú yohòtéhè Stoho-ndà Señor, doco còò ni-iin palabra nì càchí Moisés sàhà nècuàchì yucán ñà-cunduu-ne iin dùtù, ni stná descendencia xi-ne.

¹⁵ Ñàyùcàndùá, náhà chicá claru (ñà-ndáà nduá cachí xì-nsiá), vachi vichi sàni ndecunu inga dùtù, te (nicanicuahàn) quidá-yá chuun ìì mà nùù Dios nacua nìsa quida dùtù Melquisedec sàhana. ¹⁶ Vachi divi sàhà-ñá itiácú-yà nicanicuahàn, te iá cuàhà poder xi-ya, ñàyùcàndùá nì nìhì-yá chuun xi dùtù mà, màdì sàhà-ñá nduú-yá descendencia (xi inga dùtù) nacua cachí iin ley. ¹⁷ Vachi ducán nì cachi Yua-nda Dios xì Jesús:

Nicanicuahàn cucumi-ní chuun xi dùtù nacua nduú chuun nìsa quida Melquisedec.

¹⁸ Ñàyùcàndùá, nì ndañuhu ley sàhana ma, vachi cóni quèé víiá. Mànicuí chindee cuàhà-ñá nèhivì, ¹⁹ mànicuí nacuàhandee iniànè ñà-sàà-nè quida viì-né nacua ndiá ìcà-né. Ñàyùcàndùá nì sàha-yàndó inga tnùndé ini chicá ndiaha, te divi sàhájàn vètùnì thàtuu-nda nùù-yá vichi.

²⁰ Cunaha-nsiá, na ní sàha Yua-nda Dios Jesús chuun xi dùtù, nì chinaha-yá mii-yá (ñà-nicanicuahàn cunduu-yamà dùtù). ²¹ Doco dùtù (descendencia xi Leví mà), còò, cóni càhàn-yà ducán na ní sàha-yanè chuun yucán. Cuisì Jesús nduú ana nì nihìtáhvì nì càhàn xì Dios ducán, te dohó nì cachi-yà:

Yùhù nduú Stohò-ní Señor, te chináhî mií, (se-guru cundua), mà dáma inì: nicanicuahàn cucumi-ní chuun xi dùtù nahi chuun nìsa quida Melquisedec.

22 Pues ducán nì cachi-yà xì Jesús, te sàhà-ñá fuerte guá palabra xi-ya, ñàyùcàndùá chicá ndiaá tratu saa (nì saquin-yà).

23 Daaní, dùtù ùún-ní, màdì nicanicuahàn icúmí-nê chuun xi-ne, vàchi xíhì-nè; ñàyùcàndùá, cuàhà-né sàni quida xi chuun xi dùtù mà. 24 Doco Jesús, còó; mà nunca sàà inga nèhivì cunduu-ne dùtù lugar xi-ya, vàchi nicanicuahàn itiácú-yà.

25 Ñàyùcàndùá, nú xícàn tàhvi-ndà nùu Dios, te ndácùcahan-nda quìvì Jesús, vètùni dacácu dahuun-yàndó nicanicuahàn, vàchi nicanicuahàn itiácú-yà cáhàn-yà sàhà-ndà.

26 Cunaha-nsiá, meru dùtù xiñuhu-nda nduú Jesús, vàchi ì ndisa-ya, mà dáná-yá, còò cuáchi-ya, tucu dahuun iá-yà nùu nècuàchì cuàchi, te vichì dècuèndè (gloria) chicá nùu-xí ansivi sàni sàà-yà.

27 Còò necesidad icúmí-yâ dòcò-yá promesa nsiquívì sàhà-ñá nàà sàhà cuàchi nèhivì. Ducán quidá dava ga dùtù, dihna dócò-né promesa sàhà mii-né, dandu después sàhà nècuàchì dava ga. Doco Jesús, còó, iin xichi-ni nì sàha-ya vida xi-ya nì sanduu-ya promesa nì dãnáà dahuun-ya sàhà-ndà, te nicanicuahàn ndiaá ñà-jaàn.

28 Daaní, cachí stná ley sànhaha ma ñà-vètùni cunduu nèhivì iin dùtù mate iá cuàchi-ne. Doco vichì, còó, sàni yàha ley mà, te sàni cachí fuerte Dios ñà-divì Dèhemanì-yá cunduu dùtù xi-nda; te nicanicuahàn cundiaa chuun ì quidá mii-yá.

8

Nansa cáhàn Jesús sàhà-ndà nacua cachí ley saa sàni sàha Dios cunchicùn-ndà

¹ Nsidaa ñà-jaàn sàni cachì sàhà-ñá cundaà inì-nsia ñà-divì mii-yá nduú dùtù xi-nda, vàchi chuun jaàn quidá-yá vichi ndé iá-yà ansivi ladu cuahá silla ndiaha ndé iá Yua-nda Dios. ² Xinúcuáchi-yá ini vehe ìi-yá, vàchi vehe ma nduú veheñuhu ndisa xi-ya, te Stoho-ndà Señor nduú ana nì quidavàha xán, màdi nèhivì.

³ Daaní, nsidaa dùtù (ñuhìví yohó), chuun xi-ne nduá chíndoó-né promesa xi nèhivì nùù Dios, te sahmí stná-nè ñà-nduá dócò-né nùù-yá. Ñàyùcànduá nì xiñuhu cucumi stná Jesús ñà-cui chindòó stná-yà nahi promesa. ⁴ Vàchi nú nì coó ìi-yá ñuhìví yohó nì cúí, dandu mà cúí cundu-u-ya dùtù, vàchi sàndòó cuahà dùtù xi ley xi Moisés, te (nsìquívi) chíndoó-né promesa xi nèhivì nùù Dios. ⁵ Doco cunaha-nsiá, seña uun nduú veheñuhu xi nèhivì, xi stná nsidaa ñà-nduá xichúún-né nùù chuun xi dùtù mà, có-nduá ñà-ndiaha ndisa iá ansivi. Vàchi na cuáhàn Moisés quidavàha-ne veheñuhu sìcoto sàhaha, nì cachì Dios xi-né: “Caquìn-ní cuidadu ñà-quidavàha-ní nsidaájàn nacua iá veheñuhu nì dàcùnì mii-ní (na ní nana-ní) yucù yucán”. ⁶ Doco vichi icúmí Jesús iin chuun chicá ndiaha (nùù dùtù ndoó ñuhìví yohó), vàchi ley saa sàni sàha-ya vichi nduú iin ley chicá vaha, vàchi chicá ndiaha nì cachi-yà quida-ya xi-ndà vichi. ⁷ Vàchi ley primeru mà, nú còò ni-ìñàha cumànì gá nùá, dandu mà cáquín gá Dios inga ley saa ma nì cúí. ⁸ Doco cóni ndóò ini-yà xì nèhivì (nchícùn ley primeru mà), ñàyùcànduá, dohó nì cachi-yà (nùù tutu ìì):

(Yùhù nduí) Stoho-nsià Señor, te cachì, vaxì iin quìvì, dandu icúmì cuàhi iin ley saa

cunchicùn nècuàchì ñuu Israel, xì stná nècuàchì ñuu Judea. ⁹ Te ley saa ma, tucu coa nùù ley nì sàhi xii-né quivì nì tavi-nè nùù ñuu Egipto, te nì dàcúndêhí-nè ichì ndé nì caquee-ne; vâchi ley mà, cóni chívàha vii-néà. Ñàyùcàndùá nì nacoì-nè. ¹⁰ Còó, tucu coo ley saa icúmî cuàhi nsidanicuú nècuàchì mà quivì nùù-xí, cachí'. Vâchi meru ini sàxínítnùnì-nè icúmî chihi ley xi; dècuèndè meru ini anima-nè icúmî stná ndòo dahuan. Dandu mindaa yùhù cunduu ana cahvi-né, te mii-né cunduu ndisa-ne nèhivì xí. ¹¹ Te quivì yucán, mà cóó gá necesidad chinaha tnahá-né sàhí sàhà-ñá cunaha tnahá-né xì'; còó, vâchi nsidanicuú-né, icúmî-nè cunaha-né yùhù, nècuàchì ndahví te nècuàchì cuicà. ¹² Te yùhù icúmî cuicahnú stná ini sàhà nsidaa ñà-có-ndiàá nì quida-ne; te mà nunca nsinuu ga ini sàhà cuàchi-ne mà, nì cachi Dios.

¹³ Pues sàhà palabra jaàn (vâtùni cundaà ini-ndà) ley tuhú sàni nanduu ley primeru mà, vâchi ley saa nduá cachí-yà (xì inga ley nì sàha-ya). Ñàyùcàndùá, nú ñà-tùhú nduú ley sàna ma, dandu sà-ítúú ndañuhu dahuan.

9

Veheñuhu íá ñuhiví yohó xì veheñuhu íá ansivi

¹ Ley primeru mà, nì cachà xì nèhivì nansa xiñuhu cunucuachi dùtù nùù Dios, xì nansa cuyucun stná iin vehe ì ñuhiví yohó. ²⁻³ Ñàyùcàndùá, nì cuyucun iin veheñuhu sìcoto ndiadí nihni xi iin

sìcoto caní, dandu nì nandua ùi quartu. Te ini quartu primeru mà iín iin candelero, xì stná iin mesa ndé itándoó pan ìi nùù Dios. Daaní, inga ladu mà nduú vehe ndé cachí-nè nduú vehe chicá ìi. ⁴ Te icúmí lugar mà mesa oro ndé sahmí-né inciensu, te yucán iá stná caja ìi xí ley mà, idáducán iin chididá oro. Te ini caja mà inácaa iin quidi oro ndé ñuhú comida nani maná, te inácaa stná vara xi Aarón nì cana ita. Daaní, ñuhú stná ndúì tabla yùù ndé itándiaa palabra xi ley mà. ⁵ Te dìquì caja ìi mà xí-itasisi ángel ndiaha nani querubín, itanínì ndìxìn-né dìquì-nú, te tìxi ndìxìn-némà nì sanduu lugar ndé nìsa xicahnú ini Dios sàhà cuàchi nèhivì. Doco vichi có-cusáì cànàn cuàhà gué` xì-nsiá sàhà nsidaámà.

⁶ Pues nì nsihi nì cuyucun nsidaa iñàha ini veheñùhu sìcoto mà, dandu nsiquívì nìsa sàhàn dùtù ini quartu primeru mà ñà-quida-ne chuun icúmí-nê quida-ne. ⁷ Doco quartu ùi iá chicá inì-xima, cóò; cuisì dùtù chicá cusáhnù nduú ana quíhvi inì-xima, doco cutu iin quívì cada cuà quíhvi-ne, nihí-né nì (quisì) sàha-ne sàhà cuàchi mii-né xì sàhà stná cuàchi nèhivì dava ga, divì cuàchi nì quida-ne cónì sàha-ne cuenta. ⁸ Pues sàhà-ñá ducán nì ndacu nuù nèhivì sàhana ma, seña nduá nì cachitnùhu Espíritu Ìi ñà-tàyóo permisù yàha nèhivì ndè lugar chicá ìi xí-yá na quívì xichúùn vá-né vehe ìi primeru mà.

⁹ Pues cunaha-nsiá, iin ejemplu nduú nsidaa ley xi veheñùhu yucán sàhà-ñá cundaà ini ndohó nècuàchì tiempu vichi. Vàchi cachí ley mà ñà-xiñùhù dòcò-ndà cuàhà iñàha (veheñùhu), te cahmì stná-ndà quisì nduú promesa xi-nda. Doco

mate ducan ni cahvi-ndayá, mà cúí dacúxíóámà cuàchi-nda nùù sàxìnítnùnín-nda. ¹⁰ Vàchi cuisì cáhàn ley mà sàhà índù comida xiñuhu cuxi-nda, te ò índù ñà-coho-nda, ò nansa icúmí ndoo traste xi-nda, xì nansa icúmí-ndá cuchi-nda; cuisì sàhà ñà-íá ñuhíví yohó-ní cáhàn ley mà. Vàchi nì chitnùnín ini Dios ñà-cuisì cundiaàmà nùù-nda dècuèndè quívì quee inga ley saa xi-yá.

¹¹ Doco vichi sà-íá Cristu, te mii-yá nduú-yá dùtù xi-nda sàhà-ñá cui nìhìtáhvi-nda ñà-ndiaha ìí xí-yá. Te xinúcuáchi-yá ini iin veheñuhu có-íá ñuhíví yohó, vàchi màdì ndahà nèhivì nì cúyúcàn, ñàyùcànduá chicá ìí-ñá, te chicá ndiaha stná. ¹² Te mii-yá, iin xichi-ni nì quìhvi-ya ini lugar chicá ìí yucán, doco màdì nùù chelù, ò nùù litú nduá nìhí-yá nì quìhvi. Còó; divì nùù mii-yá nduá nì sàha-ya, te sàhámà vátùni nì nìhì-yá nansa càcu dahuun-nda nicanicuahàn. ¹³ Vàchi nèhivì (antes), nú sàni quida-ne iin falta nùù ley xi-ne, te có-íá ndoo ga-nè (nacua cachí ley mà), dandu xíhì buey, o xíhì litú, te xíxìn stná iin chelù dihí, te nandúú-si nahi mii yàà. Dandu sódò nsiquìn dùtù nùù quisì mà, xì stná yàà mà dìquì nèhivì mà, dandu ñà-sàni ndañuhu falta xi-ne cundua. Sàni ndundoo-ne iyuhu, mate cuisì cuerpu xi-ne, (màdì anima-nè). ¹⁴ Te nú ducán nìsa (quida nèhivì xì nùù quisì), dandu na cuahà gá más ndiaá nùù Jesús sàhà-ñá ndoo cuàchi anima-nda, nsidan-icuú cuàchi cuahàn dandáñúhú dahuun xi-nda ni cúí. Vàchi sàhà-ñá itiácú anima-yà nicanicuahàn, ñàyùcànduá nì sàha-ya meru vida xi-ya ña-cundua na iin promesa; te promesa ndiaha ndisa nduá, vàchi còò ni-iin cuàchi ni quidá-yá. Pues sàhà

nsidaájàn, sàvətùni cunucuachi víi-nda nùu mii-yá iá nicanicuahàn. ¹⁵ Vàchi sàhà ñà-nduá nì quida (Dèhemani-yá) Jesús, nì sàha-ya inga ley saa xí-yá sàhà ñà-vàha xi-nda. Mate ní quida nèhivì falta ñà-cónì chívàha viì-né ley primeru mà, doco nì xihì Jesús nì dãnàa-yá sàhà nsidaa falta mà, te vichi vətùni cundiatú anima nsidaa ana caná-yá; vətùni nihitáhvi-né ñà-vàha xi-ya dècuèndè nicanicuahàn.

¹⁶ Cunaha-nsiá, nú cuní-ndà ndutahvì dèhe-nda biene xi-nda, dandu tiaa-nda iin tutu cachí nansa ndutahvì-né. Doco fuerza cundiatu-ne dècuèndè nú sàni xihì-ndà, ¹⁷ vachi mate sàni tiaa-nda tutu mà, mà cúndiáá` dècuèndè cachì sàa cui-ndà; có-ndiáá` na itiácú ìi-ndà. ¹⁸ Ñàyùcànduá, na ní sàha Dios ley sàhana ma, nì chitnùnì stná ini-yà ñà-cui quisi, te cuitià nì-sí. ¹⁹ Vachi (ducán cachì nùu tutu ìi), nì nsihi nì cachitnùhu Moisés xì nèhivì nsidaa palabra nduú ley mà, dandu nì tnii-ne idi cuahá, xì yùcù nani hisopo, te nì dàndàxín-nèa xì nì chelù xì nì sìmbee, te nì dàcà stnahá nsidaámà xì tèculí, dandu nì sòdò nsìquìn-nè ndutè mà dìquì libru ìi xí-yá, xì dìquì nsidaa stná nèhivì itá yucán. ²⁰ Te nì cachì-nè: “Sàhà nì yohó sàni saquin Dios iin ley ñà-chivàha-nsia vichi”. ²¹ Daaní, davani nì sòdò nsìquìn stná-nè nì mà inicutu ini veheñùhu sìcoto mà xì nùu stná nsidaa còhò xichúùn dùtù nùu chuun xi-ne. ²² Vachi cachì ley mà ñà-casi nsidaa iñaha icúmì còdò nì mà ìcà-xí, te ducán ndundoa nùu Dios. Vachi cunaha-nsiá, mà sàa-yà cuicahnú ini-yà sàhà ni-iin cuàchi-nda nú còò nì nì xítìà.

Nansa nì sàha Jesucristu vida xi-ya sàhà-ñá cuxio cuàchi-nda

23 Ñàyùcàndùá, na sácuàhàn Moisés dahî-né veheñùhu sàna ma, vátùni nì xichuún-né nì quisi, vàchi veheñùhu ñuhìví yohó-ní nì sandua, te cuisì ejemplu uun nì sanduu stná, cóni sándúá veheñùhu ndisa xi-ya iá ansivi. Doco meru vehe ì-yá iá yucán, promesa chicá ndiaha xiñuhá, màdi cuisì nì quisi. 24 Ñàyùcàndùá, vichi sàni nasaa Jesús ndè meru ansivi ñà-màcuîin-yà nùu Dios sàhà-ndà. Màdi veheñùhu ñuhìví yohó nduú lugar ndé nì nasaa-yà, còó; vàchi cuisì ejemplu uun nduú veheñùhu ñuhìví yohó, có-nduú ndisa-ña vehe ì nì quidavàha mii-yá ansivi. 25 Dùtù cusáhnú raza-ndà Judea, na quíhvi-ne ini quartu chicá ì xí veheñùhu, nì (quisi) nihí-né sàhàn, màdi nì mii-né. Te cuià cuià quidá-né ducán. Doco Jesús, còó; có-xiñùhù cuàha-ya vida xi-ya cuàhà xichi, còó. 26 Vàchi nú ducan ni cúndúá, dandu cuàhà gá xichi icúmí-yà ndoho-ya dècuèndè na ní sàcòo ñuhìví xì ndè vichi ni cuí. Doco còó, vàchi na ní xinu tiempu antes, dandu nì quixi-ya ñuhìví yohó, te nì sàha-ya vida xi-ya, doco cuisì iin xichi-ni nì xihì-yà, vàchi nì dånàà nsihí-yá sàhà-ndà, te nì nihì-yá nansa cuxio dahuun cuàchi-nda. 27 Vàchi divi nacua icúmí nsidaa nèhivì sàà-nè cui-nè iin xichi, te después nsidandaà Dios sàhà-né, 28 divi ducání stná Cristu, iin xichi-ni nì sàha-ya vida xi-ya nì nacuida-ya cuàchi cuàhà gá nèhivì. Dandu después icúmí-yà naxicocuîin-yà ñuhìví yohó, doco màdi gá sàhà-ña (ndoho-ya sàhà) cuàchi-nda; còó. Cuna-naha-nsiá, divi sàhà ñà-càcu nsidaa ndohó nèhivì ndiatú naxicocuîin-yà cunduamà.

10

¹ Ley sànaaha ma, màdì meru ñà-chicá ndiaha ì xí Dios nì sándúú ndisa; cuisì nì cachitnùhu uan ñà-después icúmí quixi ñà-ndiaha ì ndisa xi-ya. Ñàyùcànduá, mate nicanicuahàn dócò ì-né promesa cachí ley mà, te cuà cuà quidá dùtù ducán, doco mà cúí ndoo cuàchi nèhivì sàhàn nùù (veheñùhu) sàhámà. ² Vàchi nú jaan, dandu mà cuáha ga xì promesa mà, vachi mà dándóhò gá cuàchi nèhivì sàxínítnùnì-nè nì cùí. ³ Doco vichi, sàhà-ñá cuà cuà sáha ì-né promesa (cachí ley) mà, ñàyùcànduá nsinúú ini-nè iá ì cuàchi-ne. ⁴ Vachi sàhà nì buey, ò nì sìmbee, mà nunca cui cuxio cuàchi ni-iin nèhivì. ⁵ Ñàyùcànduá, na ní quesaa Jesucristu ñuhivì yohó, dohó nì cachi-yà xì Yuamáni-yá:

Mii-ní, màdì promesa nduá cuní gà-ní cuàha nèhivì mii-ní. Màdiá cui quisì coco gà-si nùù-ní nduá cuní-ní. Còó. Ñàyùcànduá vichi sàni quidayucùn-ní iin iquìcúñú cumí. ⁶ Vachi màdì quisì nì xìxìn, ni màdì inga clase promesa sàhà cuàchi nduá cudî ìni-ní sàhà-xí; còó. ⁷ Dandu yùhù, nì cachi: “Yohó vaxi ñà-quida ndise cumplir ñà-nduá cuní-ní, nacua cachí tutu ì sàhí, Dios mío”.

⁸ Cunaha-nsiá, jaàn nì cachi Dios ñà-có-cudî gá ini-yà sàhà promesa sàhatahvì nèhivì, ni có-cudî gá stná ini-yà sàhà quisì sahmí-né; còó, có-cudî ini-yà sàhà ni-iin ñà-jaàn nì sàha-ne sàhà cuàchi-ne, mate divi nduá cachí ley (primeru-mà) cuàha-ne. ⁹ Daaní, después nì cachi Jesucristu: “Yohó vaxi ñà-quida ndise cumplir ñà-nduá cuní-ní,

Dios mío”. Pues ñà-jaàn cuní cachi cuàhàn-yà dandáñúhú-yâ ley primeru mà, te caquin-yà inga ley saa xí-yá. ¹⁰ Te sàhà-ña nì quida ndisa-ya nsidaa ñà-nduá nì ndacu nuù-yá, ñàyùcànduá vètùni nduhì dahuun anima-ndà, vèchi nì sàha-ya iquìcúñú-yà nahi promesa ñà-danáa-yá sàhà-ndà. Iin xichi-ni nì quida-ya ducán, doco nicanicuahàn cundiaà.

¹¹ Quivì vichi itá dùtù raza-ndà, quidá-né chuun xi veheñùhu xi-ne; te nsiquívì sàha-ne cuàhà xichi promesa xi ley mà, mate mà nunca dacúxíóá cuàchi-nda. ¹² Doco Jesús, còó, iin xichi-ni nì dãnáa-yá sàhà cuàchi-nda, te nicanicuahàn cundiaàmà, dandu nì sàcòo-ya ladu cuahá Yuamánì-yá, ¹³ te ndiatú-ní-yá dècuèndè cundee dahuun-yamà nù nsidaa ana xiní ùhì xì-yá, te cusahnú-yá nù-né. ¹⁴ Vèchi iin xichi-ni nì dãnáa-yá (sàhà cuàchi-nda), dandu nicanicuahàn icúmí ndee vaha nsidaa ana sàni ndoo cuàchi anima-xi. ¹⁵ Te divi ducán cachí stná Espíritu Ìì xí-yá. Vèchi primeru nì cachi Stoho-ndà Señor palabra yohó:

¹⁶ Tucu coo ley saa icúmí cuàhi nècuàchìmà quivì nù-xí, cachí, vèchi meru ini anima-nè icúmí nacoo dahuin ley mà; meru ini sàxìnítnùní-nè icúmí chihà.

¹⁷ Dandu después cachí-yà:

Ndè nicanicuahàn mà nunca nsinuu ga inì sàhà cuàchi-ne.

¹⁸ Ñàyùcànduá, cunaha-nsiá, nú sàni ndutu dahuun cuàchi-nda, còò gá necesidad cuàha-nda ni-iin ga promesa ñà-danáa xì sàhà-ñá.

19 Sàhà ñà-jaàn, có-yûhî gà-ndà datnátuu-nda anima-ndà nùù Dios, mate iá-yà lugar xi-ya ndé chicá ìì, vâchi sàhà nùì Jesús sà-nùná ichì, ñáni. 20 Na iin ichì saa nduá, te divi mii-yá nì qui-dayucun xán, vâchi sàhà-ñá itiácú ndiaha-yá, ñâyùcànduá iá ichì mà. (Antes iin sìcoto nìsa sadi nihni ndé nduú lugar chicá ìì xí Dios, doco) sìcoto mà, ejemplu sàhà cuerpu xi Jesús nì sandua, (vâchi na ní xihî-yà), divi sàhà ñà-jaàn nì nihî-ndà nansa yàha-nda nùù Dios. 21 Te vichi sà-ìcúmí-ndá iin dùtù ndiaha chindéé xí nsidaa ndohó ana nduú dèhe ndisa-ya. 22 Ñâyùcànduá, màsà yúhî-ndà datnátuu-nda anima-ndà nùù-yá. Iin-ni ni cúníhnú ndisa ini-ndà mii-yá; ni cúníndísâ víi-ndayá, màsà cúcáhán-ndá a jaan á coó. Vâchi sàhà-ñá nì xitià nùù-yá, ñâyùcànduá sàni ndundoo sàxìnít-nùní-ndà, te có-dàndòhó gá'-ndó; te ducán queámà na ian sàni xichi-nda tècuìì limpiu.

Màsà nándodó-nda ichì-yá

23 Pues sàhà nsidaa ñà-jaàn xiñuhu cunchicùn vii-ndà ñà-nduá xiníndísá-ndá; iin-ni ni cúníhnú vâha ini-ndà ñà-jaàn. Màsà dáma sàxìnít-nùní-ndà, vâchi sàni sàha-ya palabra xi-ya, te mà dándáhvî-yàndó. 24 Te xiñuhu stná nanducu-nda nansa nacuahandee stnahá ini-ndà sàhà-ñá chicá más ni cúcúú stnahá ini-ndà sàhà-ndà, te quida vii-ndà xì ñanitnaha-nda. 25 Nì màsà nácóó-ndá ñà-nataca-ndà na ian quidá dava nèhivì. Còó; vichi chicá xiñuhu cunuù stnàhà-ndà, te nacuahandee stnahá ini-ndà, vâchi sà-ìndéhe-nda chicá sà-cùyátní quivì (naxicocuíin-yà). 26 Vâchi cunaha-nsiá, nú sàni cundaà vâha ini-ndà nansa iá ichì ndàcuisì-yá, doco quidá canúú î-ndà

cuàchi-nda, dandu còò cá ni-iin promesa cui danàà xì sàhà-ndà. ²⁷ Ndé cuisì-ní ndóo ga ñà-yùhí cuaá-ndà, vàchi vàxi castigu cahnú, vàxi ñuhu níhi coco nsidaa ana có-ndóó ladu xi-ya. ²⁸ Nèhivì sàhana, nú nì cahíchi ini-nè ley xi Moisés, dandu fuerza cui-nè nú ndoó ùì ò ùnì testigu cachí nansa nì cuu, te nú ducán, dandu còò iin ni cuhí ini xì-né na ní xihì-nè. ²⁹ Doco nú meru Dèhemanì Dios nduú ana cahíchi ini iin nèhivì, dandu ¿nansa tuxí inì-nsia cuu? ¿Amádi cuàhà gá más castigu icúmí-nè nihì-né? Vàchi nú có-quidáñuhú-nè ñà-nì xitià nì ndiaha-yá, dandu cahnú sàstnùhù coo castigu xi-ne, vàchi sàhà nì mà nì ndoo anima-nè, te sàhà stná mà nì saquin Dios iin tratu xì-né. Daaní, stná Espíritu Ìì xí Dios, gracia nì quida stná-yà xì nècuàchìmà, doco nú vichi cutu nì cahíchi ini-nè nsidaámà, dandu ndahví-nè. ³⁰ Ináhá-ndá ñà-divi Dios nduú ana nì cachi xi-ndà dohó: “Mii quidá tocar nachitacùhá sàhà falta xi nèhivì; còò cá ana icúmí nacùaha xi-né castigu”. Te cachí stná (tutu ìì) ñà-divi mii-yá icúmí-yâ nsidandaà-yà sàhà cuàchi nèhivì xí-yá. ³¹ Cunaha-nsiá, tnùndoho cahnú cundua nú ni níhì nèhivì castigu nùù ndahà Dios iá nicanicuahàn.

³²⁻³³ Doco mii-nsiá, xiñuhu nsinuu ini-nsià nansa nì cuu xi-nsiá quìvì primeru na lácà nì dàtnùù-yà sàxínítnùnì-nsiá, cuàhà tnùndoho nì yàha-nsia. Dava xichi nì canàhá nèhivì xì-nsiá, te dava xichi nì dándòhó stná-nè mii-nsiá nùù tàcá nèhivì. Te dava xichi cuisì-ní nì quida-nsia acompañar nècuàchì nì ndoho ducán, doco calma nì quidandee inì-nsia sàhà nsidaámà. ³⁴ Te na ní sàcùndiadi stná compañeru-nsiá, dandu nì

indehè ndahví-nsiànè; te na ní candiaa nèhivì biene xi-nsia, (cónì cúhúún inì-nsia), còó, duha nì cudìi inì-nsia, vèchi ináhá-nsiâ, ndè gloria xi Dios chicá cuàhà ñàha icúmí-ndá, te chicá ndiaá` mà, vèchi nicanicuahàn cunaha-ñá. ³⁵ Ñàyùcàndüá, iin-ni ni cúníhnú vaha ini-ndà (ichì-yá), màsà nácóó-ndáñâ, vèchi iin ñà-vàha cahnú icúmí-ndá nihì-ndà nùù-yá. ³⁶ Iin-ni ni cúnchícùn cuéyàà-ndà ichì mà, vèchi nú sàni nsihi nì quida-nda nsidaa ñà-ndüá cuní Dios quida-nda, dandu nihì-ndà ñà-ndiaha ñi sàni cachi sahnú-yá xi-ndà. ³⁷ Vèchi dohó cachí tutu ì:

Cunaha-nsiá, icúmí-yâ naxicocuñin-yà: làcà sacu tiempu cumánì gá; mà cuéé gà-yà. ³⁸ Te (cachí stná-yà): “Nèhivì vaha xi, nú xiníndísâ vaha-ne yùhù, dandu nihì-né vida ndiaha. Doco nú ni ndédúmá ini-nè, dandu ni-iyuhu mà ndóo inì sàhà-né”, cachí-yà.

³⁹ Doco ndohó, có-ndùù-ndà nèhivì ndedúmá ini-xi, vèchi nú jaan, ndañuhu anima-ndà. Còó, nèhivì xiníndísâ nduu-nda, ñàyùcàndüá icúmí-ndá càcu-nda nùù-yá.

11

Xiñuhu cunindísá ví-nda

¹ Nú ndisa xiníndísâ vaha-nda Dios, dandu cuní cachàmà ñà-nìhnú cuisì ini-ndà icúmí cuu ndisa ñà-ndüá ndiatu-nda. Te nú xiníndísá-ndá ducán, dandu quidá stná-ndà cuenta na ian sà-íá ndisa ñà-tañáha ga cuninùù-ndà. ² Te divi ñà-jaàn nduú stná ñà-ndüá nìsa quida xii-ndà sàhana, nì xinindísá-né mii-yá, te nì ndee vaha-ne nùù-yá.

³ Ndohó, xiníndísá-ndáyâ, te sàhájàn vátùni cundaà ini-ndà nansa nì quidavàha-ya ñuhìví, cuisì nì càhàn-yà, te nì sàcòà; ñàyùcàndùá, indéhe-nda iá ñuhìví vichi, doco màdì ñà-tùí cundehè-ndà nduá nì cuyucàn; còó.

⁴ Daaní, Abel, na ní sàha-ne Dios promesa xi-ne, chicá nì sandiaàmà nùù promesa nì sàha Caín. Te ¿índù chuun chicá ndiaámà? Divi sàhà-ñá nì xinindísá nècuàchìmà mii-yá. Ñàyùcàndùá, nì cachi-yà: “Sàni ndee vàha Abel nùí; cudíi inì sàhà promesa xi-ne”. Ñàyùcàndùá, mate còò cá Abel mà, doco dècuèndè vichi iá ì fama-nè ñà-nì xinindísá-néyà.

⁵ Daaní, Enoc tu, nì xinindísá stná-nè mii-yá, te vivu nì sàà-nè nùù-yá, cóni xihì-nè, nì ndañuhu uun-ne (nùù nèhivì), vàchi sàhà poder ndiaha xí Dios nì ndiachi-né dècuèndè ndé iá-yà. Te cachí tutu ì, ducán nì cuu xi-né ñà-nì cudíi guá ini-yà sàhà-né. ⁶ Doco nú có-xiníndísá-ndá, dandu mà nunca cudíi ini-yà sàhà-ndà. Vàchi nú cuní-ndà sàà-ndà nùù-yá, dandu fuerza cunindisa-nda iá ndisa-ya, te seguru datnúù-yà sàxínítnùnì nsidaa ana nandúcu ndisa-xi-yá.

⁷ Daaní, stná Noé, nì xinindísá stná-nè mii-yá na ní cachitnùhu-ya xì-né ñà-ndùá icúmí cuu quivì nùù-xí; ñàyùcàndùá, nì quida-ne ñà-ndùá nì cachi-yà, nì quidavàha-ne iin barcu cahnú sàhà-ñá càcu-ne, mii-né xì stná nèhivì vehe-ne. Ducán nì quida-ne, te ñà-jaàn claru nì tùì ñà-cóni quidá víi dava ga nèhivì ñuhìví. Doco mii-né, nì ndee vàha-ne nùù-yá ñà-nì xinindísá-néyà.

⁸ Daaní, stná Abraham; nì xinindísá stná-nèyà, te ñàyùcàndùá nì quee-ne cuàhàn-nè na ní

cana-yanè ñà-cùhùn xicà-né inga ñuu ndé icúmí-nê sàà-nè cunduu-ne stoho nsidaa ñà-ia yucán. Ñàyùcànduá, nì inini-ne ñà-nduá nì ndacu nuù-né, mate có-cùndáa ini-nè índù cùhùn-nè. ⁹ (Dandu nì sàà-nè) ñuu ndé nì cachi Dios xì-né mà. Yohó te yucán nì là chii-né ñuu mà, nihnú ini-nè nduú-né nècuàchì inga ñuu, doco siempre iin-ni xiníndísâ víi-néyà. Cuisì vehe sìcoto nì sanduu vehe-ne, te divi clase vehe yucán nìsa xichuún stná (dèhe-ne) Isaac, xì stná (dèheñani-né) Jacob. Cunaha-nsiá, stná nècuàchì yucán, iin-ni nì sandiatu stná-nè cuu xi-né ñà-nduá nì cachi Dios xì Abraham antes. ¹⁰ Vàchi nècuàchì mà, (na ní quee-ne ñuu-nè), nandú-cú-nè iin ñuu sàni quidavàha-ya; vachi nihnú ini-nè ia iin ñuu nì chitnùní ini mii-yá coo, te fuerte ndisa cimientu xan.

¹¹ Daaní, stná (ñahàdihí-nè) Sara, nì xinindisá stná-nè mii-yá. Mate sáyâha ga sahnú-né, doco nì nihitáhvi-né valor ñà-coo iin mée xi-ne, vachi antes sàni cachi sahnú Dios xì-né, te ñàyùcànduá nì tùinuù iin dèhe-ne, vachi xiníndísâ-né mà nunca dandahví-yànè. ¹² Ñàyùcànduá, mate sàsàhnú cuàha Abraham, doco nì là iin dèhe-ne, te sàhà imíndaa dèhe-nemà nì sàà-nè nì sàcùnduu-ne yohòtéhè cuàhà gá mìl nèhivì; cuàhà sàstnùhù nèhivì nì nanduu-ne nahì cuàhà sìtnùù ansivi, ò ñusi ndiquin yuhù mar, vachi mà cùì nandiahvia.

¹³ Cunaha-nsiá, nsidaa nècuàchì sàni nacani xì-nsiá sàhà-ximà, iin-ni nì xinindisá víi-né mii-yá dècuèndè nì xihì-nè. Te mate cóni sàà-nè cun-inùù-né cuu ndisa ñà-nduá nì cachi Dios xì-né, doco iin-ni nì xinindisá-né, mate tàyóá, te nì cudii ini-nè sàhà-ñá, vachi (nì cundaà ini-nè) màdì ñuu ndisa-ne nduú ñuu-nè ñuhivì yohó, ñàyùcànduá nì

cachi-nè xì nèhivì ñà-cuisì-ní yáha uun-ne ñuhíví yohó. ¹⁴ Te nú ducán cachí nèhivì, dandu náhà claru inga ñuu nduá nandúcú-nê, iin ñuu ndé cunduu ñuu ndisa-ne. ¹⁵ Te nú cuàhàn-nè nsinuu ini-nè ñuu-nè primeru nì cuí, dandu vihini naxi-cocuîñ-nè yucán. ¹⁶ Doco còó, cóni núhù-nè, vâchi nì cuni-nè cundoo-ne iin ñuu chicá ndi-aha, divi ñuu mii-yá iá ansivi. Te sàhà-ñá (nì xinindisá-né ducán), ñàyùcànduá có-ndùcáhán-yá cachí-yà ñà-ndùú-yá ana cahvi-né, vâchi sàni quidayucun-yà iin ñuu (ndiaha) ndé cundoo-ne (xì-yá).

¹⁷ Daaní, después, nì cachi Dios xì Abraham ñà-nì cuáha-ne dèhe-ne Isaac cunduu-tè iin promesa. Ducán nì quida-ya sàhà-ñá cundaà ini-yà a cunini vii-néyà, á coó. Te (nì quida-ne cumplir), nì xinindisá-né mii-yá, dispuestu nì ìa-ne ñà-cunduu dèhe-ne promesa, mate mindaa-té nùù-né, te mate antes sàni cachi sahnú Dios xì-né ¹⁸ ñà-divi nùù tèchii Isaac mà icúmí quee cuàhà descendencia xi-ne. ¹⁹ Doco nì cundee ini-nè ñà-vàtùni danátíacú-yàte nú ni cuí-te. (Te ñà-nì càcu-tè) nì ndòò-tè vivu nùù-né, ñàyùcànduá vátùni quida-nda cuenta na ian ndisa, sàni natiacù-te.

²⁰ Daaní, después (nì cundaà ndisa inì-xi) ñà-xiníndisâ stná Isaac mà mii-yá, vâchi cuàhà gá ñà-ndiaha î nì cachitnùhu-ne xì (ùì dèhe-ne) Jacob xì Esaú sàhà nansa icúmí cuu xi-né quìvì nùù-xí. ²¹ Daaní, Jacob mà, nì xinindisá stná-nè mii-yá, (ináhá-ndá), vâchi na sá-ítúú cuàhàn-nè cui-nè, dandu nì càhàn-nè xì iin iin dèhe José, nì cachitnùhu-ne xì dèheñani-né mà ñà-icúmí-té nìhì-té cuàhà ñà-vàha ndiaha nùù Dios. Ducán

nì cachi-nè, naquímànì-né Dios, te itúú-né nùù bastón xi-ne. ²² Daaní, José mà, nì xinindisá stná-nè mii-yá, (ináhá-ndá), vàchi na sá-itúú cuàhàn-nè cui stná-nè, nì cachi-nè ñà-seguru icúmí caquee libre nsidaa nècuàchì raza-nè Israel nùù ñuu Egipto. Te nì nacoò stná-nè órden nansa quida nèhivì xì iquìcúñú-nè nú sàni xihì-nè.

²³ Daaní, stná yuadíhí Moisés, nì xinindisá stná-nè mii-yá na ní tùinuù dèhe-ne mà. Te nì caxini-nè cuahani iá-vè, ñàyùcàndùá mate sàni dándacú rey cui-vè, doco cóni yúhî-nè; ùni yòò nì ia dèhé-vè nì quida-ne.

²⁴ Daaní, stná Moisés mà, nì xinindisá stná-nè mii-yá, te sàhámà na sàni sahnu-ne, cóni cùnì-nè cachi gà nèhivì ñà-dihi-né nduú dèheyoco rey. ²⁵ Còó, chicá nì cudìi ini-nè cùhùn-nè cutnahá-né xì nèhivì xí Dios, mate cuáhà gà nì ndòhó-né, te màdìá ndòo-ne (ndé iá-nè), te quida-ne ñà-vico sìquini iá ñuhìví yohó, vàchi cuisì sacù-ni tiempu coo ñà-vico ma. ²⁶ Chicá nsiha ichì Cristu ni cúnchícùn-nè nihnú ini-nè, mate ni cáhîchì ini nèhivì-né; te cóni xího stná-nè ñà-cuicà ñuu Egipto yucán, vàchi iin-ni nihnú ini-nè ñà-cuisì nùù Dios icúmí-nè nihítáhvì-né cuáhà ñà-ndiaha ñ.

²⁷ Daaní, na ní quee-ne ñuu Egipto mà cuàhàn-nè, divì sàhà-ñá xiníndísâ-né mii-yá nì sandua. Ni cóni yúhî-nè ñà-nì xidà guá ini rey dandacú yucán, vàchi iin-ni nchícùn viì-néyà na ian xinínùù-néyà, mate có-tùí-yá indéhe-nda.

²⁸ Daaní, ñà-sàni xinindisá-né mii-yá nduú stná na ní quida-ne vicò pascua primeru, mii-né xì nèhivì raza-nè, te nì dàcáa-ne nùù (lèlù icà yehè-né) sàhá màsà cúí dèhe sahnú-né quida ángel yàha

yucán. ²⁹ Daaní, na ní yàha-ne Mar Cuahá, te nì nduhìchí cahà mar mà nahi ñuhù íchí, divi sàhà-ñá nì xinindisá-né Dios nì sanduu stná` mà. Doco tè-ñuu Egipto, na ní cuni stná-te yàha-tè yucán, dandu nì càhà nsihi-tè.

³⁰ Daaní, sàhà-ñá nì xinindisá stná nèhivì raza-ndà mii-yá, ñàyùcàndùá nì nacununduu-nè ñuu Jericó ùsà quivì, te nì caà nama ndiadí nùù ñuu mà. ³¹ Daaní, stná nècuàchì ñahà nani Rahab, mate cuàhà tiàa nì xicanuu xi-né (antes), doco nì sàà-nè nì xinindisá stná-nè mii-yá, vàchi na ní techuún Moisés iin ùì tiàa ñà-nacunì-te nañsa iá ñuu nècuàchìmà, dandu nì chindee-néte. Ñàyùcàndùá, cónì xíhì-nè nahi nèhivì dava ga có-xiníndísá.

³² Pues vichi có-xiñùhù cachi guè (sàhà nèhivì sàhana ma), ni mà sàà stnáì nacani nsihi xì-nsiá sàhà nsidaa-né, divi sàhà Gedeón, xì sàhà Barac, xì Sansón, xì Jefté, xì David, xì Samuel, xì sàhà stná dava ga nècuàchì nisa cahàn cuenta xi Dios.

³³ Cunaha-nsiá, divi sàhà-ñá nì xinindisá nsidaa nècuàchìmà mii-yá, (ñàyùcàndùá nì quida-ne cuàhà obra ndiaha). Dava-ne nì cundee-né nùù nsidaa nèhivì ndoó inga ñuu. Dandu nì cusahnú víi-né, te nì nìhì-né ñà-vàha nì cachi sahnú Dios xì-né. Te dava-ne nì càcu-ne nùù nsicaha, cónì sàxí-siné. ³⁴ Te dava stná-nè, nì cundee-né nùù ñuhu xíxìn, cónì quidá dañúá xì-né. Te dava-ne nì càcu-ne nùù nèhivì cuàhàn cahni xì-né xì espada nì cúì. Stná nècuàchì còò fuerza xì, nì xinindisá stná-nè mii-yá, te nì ndufuerté-nè, vátùni nì nacuahandee ini-nè, te na ní caquixi soldadu inga ñuu, vátùni nì chindee-né mii-né, te nì taxi-né nsidaa tèmà. ³⁵ Stná nècuàchì ñahà, nì xinindisá stná-nèyà, te ñàyùcàndùá nì nìhìtáhvi

dava-ne nì natiacu iin nèhivì vehe-ne. Doco dava stná nècuàchìma, nì dándòhó nèhivì-né, te nì xihì-nè; vihini dacácu-tèné nì cùì (nú ni nácóó-né ichì-yá); doco còó, cóni quidá-né ducán, vèchi cunì-nè nihìtáhvi-né iin ñà-vàha chicá ndiaha, divi ñà-natiacu-nè. ³⁶ Daaní, dava stná nècuàchì sànhama, cuàhà gá nì sàcùndiaa nèhivì-né, te nì ñàhni cùì stná-nè. Te dava stná-nè, nì sàcùnuhni stná-nè cadena, te nì sàcùndiadi-nè. ³⁷ Te dava stná-nè, nì sahnì nèhivì-né xi yùù, ò machete. Te dava-ne, serruchu nì quedava-ne. Cuàhà gá nì candoho-ne nì quida nèhivì. Ñàyùcàndùá, yohó te yucán nì xìcanuu ndahví-nè, nìsa idàhvi-ne xì cuisì iin rii ò sìmbee, vèchi ndahví dahuun-ne, cuàhà tñundoho nì xini-nè; quini nì dándòhó nèhivì-né. ³⁸ Nì xìcanuu ndahví-nè yucù dānā, ò inga xaan ndé còò nèhivì, te yucán nì caquidì-nè ini cueva, ò ini iin chìcòhò cahnú. Ducán nì cuu xi-né mate chicá ndiaá-nè nùù nsidaa gá nèhivì ñuhivì. ³⁹ Doco nsidaa nècuàchì sànhama, mate ní nihì-né nì ndee vaha-ne nùù Dios ñà-nì xinindisá-néyà, doco cóni nihìtáhvi-né ñà-ndiaha î nì cachi-yà (xì xii-ndà) antes. ⁴⁰ Còó, vèchi sàhà-ñá nihnú stná ini-yà ndohó, ñàyùcàndùá nì chitnùní ini-yà ñà-dècuèndè quivì vichì coo iin ñà-chicá ndiaha nihìtáhvi-ndà, dandu iin-ni nacuatnaha-nda xi nècuàchì yucán cundiatú anima nsidaa-nda.

12

Cuisì Jesús ni cúndéhe-nda nùù-xí

¹ Vichi cuàhà sàstnùhù nèhivì (sànhama) sàni nacani xi-nda ñà-ndiaha guá iá (nú xiníndisá-ndá mii-yá). Ñàyùcàndùá, xiñuhu nacoo dahuun-nda

nsidaa iñaha sadí xì nùù-ndà. Ni nácóó-ndá nsidanicuú cuàchi quida-nda, vàchi ñà-yùcán nduá dacá xi dìni-ndà. Iin-ni ni cúnchícùn vii-ndà mii-yá inii vida xi-nda; nacua quidá nècuàchì dadavá stnahá xinú carrera, ducán xiñuhu nacuàhandee ini-ndà. ² Iin-ni ni cúndéhe-nda nùù Jesús, vàchi sàhà mii-yá nì quesaha-nda xiníndísá-ndá ichì-yá, te divi-ya icúmí chindee stná xì-ndà ndè cachì xìnu vida xi-nda. Te mate nchìca cruz nì ndoho-ya, doco cónì ndúlócô-yà na ní cahíchì ini nèhivì-yá ñà-nì xhì-yà ducán, vàchi ináhà-yâ, después icúmí-yâ sàà-yà coo-ya contentu. Daaní, (mànuhù-yá gloria), te yucán nì sàcòo-ya ladu cuahá Yua-nda Dios.

³ Pues vichi xiñuhu nsinuu inì-nsia nansa nì cuu xi-yá, cuàhà gá nì quida quini nèhivì cuáchi xi-yá, doco nì quidandee ini-yà. Ñàyùcàndùá, nsinuu inì-nsia ñà-jaàn, còtó cucahan-nsiá mà cúndéé gâ inì-nsia, te cuhuun inì-nsia. ⁴ Vàchi ñà-ndáà nduá, cuàhà lucha fuerte sàni quida-nsia ñà-màsà cúndéé nèhivì cuáchi ma nùù-nsiá, doco ni-iin-nsia tàñáha ga cahni-né. ⁵ Doco nacua indéhi sàni nandòdó-nsiá nansa cachì Dios nùù tutu ìì ndé cáhàn-yà xì-ndà na iin yua-nda. Pues dohó cachì-yà:

Hijos míos, màsà cúñáñá-nsiâ nú nani-nsia nùù yùhù ana nduú Stoho-nsiâ Señor; còó, ni màsà cúhúún stná inì-nsia nú sàni sàhi-nsiâ iin conseju tii. ⁶ Vàchi Stoho-nsiâ nduí, te cuú inì sàhà nsidaa-nsiá, ñàyùcàndùá fuerza nàni-nsia, vàchi nsidaa ana sàni nacàxin ñà-cunduu-ne dèhi, icúmí-nê ñàhni stná-nè, cachì Dios.

⁷ Ñàyùcàndùá, xiñuhu quidandee ini-ndà na

náni-nda nùu-yá, vèchi sàhà-ñá nduú ndisa-nda dèhe-ya nduájàn. Sà-ìnáhá-ndá, na cuati-nda, nsidanicuu-nda nì nìhì-ndà conseju nùu yua-nda. ⁸ Doco quìvì vichi, nú còò ni-iin conseju níhì-ndà nùu mii-yá, dandu cuní cachàmà ñà-có-nduú ndisa-nda dèhe-ya, vèchi nsidaa ana nduú dèhe ndisa-ya, ducán quidá-yá xì-né. ⁹ Vèchi yua-nda ñuhiví yohó, nìsa danáni stná-nèndó, te nìsa cahvi-ndané. ¿Amádi chicá ndiá ìcà-ndà cundoo stná-ndà sujetu nùu Yua-nda iá ansivi, te ducán nìhì-ndà cutiacu ndiaha-nda? ¹⁰ Vèchi sacu tiempu nì ndòo-nda nùu yua-nda ndoó ñuhiví yohó, te nacua cudí ini-nè, ducán nìsa danáni-nèndó. Doco mii-yá, cuisì sàhà ñà-cunduu ñà-vàha xi-nda nduá danáni-yàndó, te ducán cunduu ndisa-nda nèhivì ì nahi mii-yá. ¹¹ Pues ñà-ndáà nduá, có-cudí ini-nda na hora níhì-ndà conseju; tnùndoho nduá cahan-nda; doco nú sàni yàha, te sàni sàà-nda nì cundaà vaha ini-nda, dandu chicá ndiaha coo vida xi-nda, vèchi chicá vì sàni sàà-nda nacani ini-nda.

*Cuàhà gá peligru ndácàn nú cahíhì ini-nda pal-
abra cachí Yua-nda Dios*

¹² Ñàyucàndùá, màsà cùndóó-nsiá cuhúún gá inì-nsia na ian nì còyo ndahàsàhà-nsiá; còò. Iin-ni ni nácuàhandee inì-nsià cuníà, ¹³ micuísì ichì váha-ya nanducu-nsiá sàhà-ñá màsà tucù iin nècuàhì tàcútùha vì cacanuù nacua ndiá ìcà-né. Te nú sà-íà iin ana tàcúndáà vaha inì-xi ducán, dandu nanducu-nsiá nansa ndufuerté anima-nè.

¹⁴ Nì cùndóó mánì-nsiá xì nsidaa ñanìtnaha-nsia, te nì cuàhandee stná inì-nsia cunihnu ì inì-nsia nicanicuahàn, vèchi nú có-nìhnú î ini-nda, mà nunca sàà-nda cuni-nda nùu Stoho-nda

Señor. ¹⁵ Te cuidadu ni cúndóo stná-nsià còtó nandòdó-nsiá gracia xi-ya, te sàà-nsià nanduu-nsia nèhivì malu ndedúamá inì-xi, vèchi nacua quidá iin yohò yùcù dàná, ducán cui quida stná nècuàchì malu, mate imindaa-né, doco vihini cunduu-ne dañu xi cuàhà gá nèhivì. ¹⁶ Ñàyùcàndüá, cuidadu cundoo-nsia, còtó coo iin-nsia cùtóo xì ñahà, te ò iin ana có-ndùlócô-xì ichì ñi-yá na ian nì quida Esaú sàhana. Dèhe sahnú nì sanduu-ne, ñàyùcàndüá, icúmí-nê ndutahví-né cuàhà ñà-ndiaha ni cuí, doco nì dama-ne derechu mà sàhà cuisì iyuhu ñà-ndüá nì xixi-ne. ¹⁷ Te ináhá-nsiâ nansa nì cuu xi-né después, cóni níhi-né ndutahví gá-nè ñà-ndiaha ma nùù yua-né, mate yáha ga nì cuni-nè nìhi-néà. Nì sacundahví-nè (nùù nècuàchì mà), te nì sacu fuerte-nè, doco mànicuí gá, vèchi cóni níhi-né nansa nadama-ne ñà-ndüá sàni quida-ne mà.

Tucu iá ñà-ndüá nì xini nèhivì sàhana na ní sàha Dios-nè ley primeru

¹⁸ Vèchi ndohó, cóni tnátuu-nda nùù iin yucù (ñuhiví yohó nacua nì quida nècuàchì Israel sàhana), vèchi yucù (Sinaí yucán), xixàn, te iin tnúú ndúchí, có-tùnúù, te caná fuerte tàchì. ¹⁹ Te nì sivi stná corneta; dandu nì tiacu cáhàn fuerte mii-yá. Doco nèhivì mà, nì sacundahví-nè nùù-yá ñà-màsà cáhàn gà-yà xì-né ducán. ²⁰ Vèchi màni cúndéé gâ ini-nè quida-ne cumplir palabra nì cachi-yà. Te dohó nì cachi stná-yà: “Màsà náná-nsiá icà yucù jaàn, te ni quisi xí-nsiá, vèchi nú ducán, dandu icúmí-nsiâ cahni-nsiási xi yúù, ò xì lanza”. ²¹ Cunaha-nsiá, yáha ga nì cayùhí cuaá nèhivì mà na ní indehè-né nansa nì cuu. Dècuèndè

stná Moisés nì cachi-nè: “Ndé quídí cuísí ñà-yúhí güè”.

²² Doco ndohó, còó, vàchi ichì yucù nani Sión sàni quihin-nda vichi, vàchi yucù yucán nduú ñuu mii-yá iá nicanicuahàn. Te Jerusalén Nsiaha Iá Ansivi, ducán nani stná ñuu mà. Te sàni sàà stná-ndà ndé ndoó tàcá cuahà mil ángel xi-ya, ²³ ndeníhí vaha-neyà. Te sàni nacuatnahá stná-ndà xì nsidaa gá nèhivì xínduu dèhe-ya, divi nsidaa ana itándiaa quìvì-xí ndé gloria xi-ya. Te sàni dàtnátuu stná-ndà anima-ndà nùu mii-yá ana icúmí nsidandaà sàhà nsidaa nèhivì, divi nduú Dios; te vichi iin-ni sànduú stná-ndà xì nèhivì nì ndee vaha nùu-yá sàhana, doco vichi sàni nìhì stná-nè nì cundiatú ndiaha stná anima-nè. ²⁴ Vàchi nùu Jesús sàni tnátuu anima nsidaa-nda, vàchi divi mii-yá nduú ana cáhàn nihni sàhà-ndà, te nì saquin stná-yà iin tratu saa xi-nda, divi nduú ñà-nì xitià nìi-yá (sàhà-ndà); te cunaha-nsiá, chicá ndiaha quidá nìi-yá mà nùu nì Abel sàhana.

²⁵ Ñàyucànduá, cuidadu ni cúndóó-nsiá ñà-màsà nácuáa-nsiá mii-yá ana cáhàn xì-ndà vichi. Vàchi nú cóni cácu nèhivì sàhana na ní cahíchì ini-nèyà na ní cáhàn-yà xì-né ñuhiví yohó, dandu chicá mà cácu ndohó nú cahíchì ini-ndà palabra cachí-yà xì-ndà dècuèndè ansivi. ²⁶ Na ní cáhàn-yà antes, fuerte nì tnàa ñuhiví; doco vichi sàni cachitnùhu-ya xì-ndà inga palabra yohó, cachí-ya: “Inga xichi icúmí datnái ñuhiví. Doco màdì cuísí ñuhiví yohó icúmí tnàa; còó, dècuèndè stná ansivi icúmí tnàa”. ²⁷ Te na ní cachi-yà palabra mà ñà-inga xichi icúmí tnàa, pues cuní cachàmà ñà-icúmí cuxio nsihi nsidaa ñà-nduá nì quidavàha-ya ñuhiví yohó.

Doco nsidaa ñà-cuàhàn cunaha nicanicuahàn, icúmíá ndò. ²⁸ Vàchi ñuhìví ìì ndé icúmí-ndá cundoo-nda, mà nunca ndutá. Ñàyùcàndùá, iin-ni xiñuhu naquimanì-ndàyá sàhámà sàhà-ñá vátùni cunucuachi víi-nda nùù-yá nacua cuní-yà quida-nda, te cahvi víi-ndayá; màsà nácuìdiqui uun-nda ichì-yá, ²⁹ vachi nahi ñuhu níhi nduú-yá, te mà ùhì cahmi nsihi-ya (ana cahìchì ini).

13

Nansa quida-nda, te cudii ini Dios sàhà-ndà

¹ Iin-ni ni cuú stnahá ini-ndà sàhà-ndà na ian iin-ni ñaní xínduu-nda. ² Màsà nándodó-nda coo manì ini-ndà xì nèhivì cóyo vehe-nda, vachi dava nèhivì, ndè stná ángel xi Dios nì dáyáha-ne vehe-ne, te cóni cúndàà ini-nè. ³ Te xiñuhu nsinuu stná ini-ndà compañeru-ndà xíndiadi vehecàa; te ducán quida-nda cuenta na ian cutnáhâ stná-ndà xì-né ndiadi-ndà. Te nú quidá quini nèhivì xì dava ga compañeru-ndà, dandu cundehè ndahví stná-ndà nècuàchìmà, vachi na nèhivì nduú stná-ndà, te vi-hini cuu stná xì-ndà ducán iin quivì.

⁴ Daaní, xiñuhu quida tññuhu stná-ndà xì nècuàchì vehe-nda. Màsà quidá-ndá ni-iin falta xì inga nèhivì. Vachi iin castigu fuerte cuàha Dios ana nchícùn xì ñahà, te ò ana cáhàn xì nècuàchì có-nduú nècuàchì vehe-xi.

⁵ Màsà xího-nda cucumi-nda ñà-cuicà ñuhìví yohó. Nacua sà-icúmí-ndá, xì ñà-jaàn-ní ni cúndóó-ndá contentu, vachi sàni cachi-yà: “Yùhù, mà nunca nandòdí mii-nsiá. Mà nunca nacoo nihni mii-nsiá”. ⁶ Ñàyùcàndùá, vátùni càhàn ndee-nda, cachí-ndà:

Divi Stoho-ndà Señor nduú ana chindéé xî. Mà yúhî, vâchi còò ni-ĩñàha cui quida nèhivì xî'.

⁷ Daaní, xiñuhu nsinuu stná inì-nsia nècuàchì nìsa idònuù nùù-nsiá antes, divi nècuàchì nìsa dacuaha-xi-nsiá palabra ìì xí Dios. Xiñuhu nsinuu ini-nsià nansa nìsa quida viì-né vida xi-ne, te iin-ni ni cúníndísâ stná-nsià nahi mii-né.

⁸ Cunaha-nsiá, iin-ni iá Jesucristu, dècuèndè sànhà xi vichi, te nicanicuahàn.

⁹ Màsà cuáha-nsia chiyuhù nèhivì-nsiá ñà-cunchicùn-nsià inga ichì có-ìnhá-nsiâ, vâchi cuàhà ichì tùcù iá chináhà-nè; cuàhà gá ichì tàcùnì-ndà iá. Doco ndohó, chicá vâha cuisì gracia xi mii-yá ni cúníhnú ini-ndà, te ndufuerté anima-ndà, màdíá cunchicùn-ndà iin ley cachí sàhà cuisì índù comida cui cuxi-nda, vâchi nèhivì nacání guâ inì-xi sàhámà, còò ni-iin ñà-vâha xi anima-nè tavá-né.

¹⁰ Dùtù xinúcuáchí veheñùhu (xi raza-ndà, itiácú-nè ñà-nduú promesa xi nèhivì). Doco ndohó, iá stná promesa xi-nda, (divi nduú Jesús); doco nècuàchì veheñùhu ma, còò derechu xi-ne nihìtáhvi-né ni-ĩñàha nùù mii-yá. ¹¹ Vâchi quisì nduú promesa sáha-ne veheñùhu ma, xítia nì-sí, dandu nihí dùtù-ñà sàhàn ndé nduú lugar chicá ìì, te quidá-néamà presentar sàhà cuàchi nèhivì. Doco iquicúnú quisì mà, còò; ndè fuera ñuu icúmíâ coca. ¹² Pues divi ducán nì cuu stná xì Jesús sàhà-ñà nihì nèhivì ndoo ndisa cuàchi-ne sàhà nù-yá. Vâchi fuera ñuu nì ndoho stná-yà. ¹³ Ñàyùcànduá ndohó, iin-ni ni cúnchicùn stná-ndàyá, mate icúmí-ndá naco-nda ñuu-ndà, te cahíchì ini nèhivì-ndó nacia nì quida-ne xì mii-yá. ¹⁴ Vâchi ni-iin ñuu iá

ñuhiví yohó, mà cúndúá ñuu-ndà nicanicuahàn. Còó, iin ñuu quesaa quìvì vaxi xi-nda nduá ndiatu-nda. ¹⁵ Ñàyùcàndùá, nicanicuahàn ndiá ìcà-ndà ndenihi vaha-nda Dios sàhà ñà-nduá nì quida Jesús. Vàchi na iin ofrenda xi-nda nùù-yá nduájàn na ndácùcahan-nda quìvì-yá, te naquímànì-ndàyá.

¹⁶ Daaní, màsà nándodó stná-ndà quida-nda obra xì ñanìtnaha-nda, te chindee stnaha-nda, vachi ñà-jaàn ndisa nduú promesa cudù ini-yà sàhà-xí.

¹⁷ Nsidaa ñà-nduá cachí nècuàchì idónuu nùù-nsiá, cunini-nsiá, te cundoo-nsiá sujetu nùù-né; vachi inùù-né nùù-nsiá sàhà ñà-cunduu ñà-vaha xì anima-nsiá; te icúmí stná-nè nacuaàha-ne cuenta nùù Dios sàhà nsidaájàn. Ñàyùcàndùá, cunini-nsianè sàhà-ñá cudii ini-nè quida-ne chuun ma, te màdiá dacúhúún ini-nsianè; vachi nú nì cúhúún ini-nè quida-nsiá, mà cúí cunduamà iin ñà-vaha xi-nsiá.

¹⁸ Cacán tàhvì-nsiá nùù Dios sàhà-nsí, vachi ináhá-nsí còò ni-iin cuàchi dandoho-xi-nsí, te iin-ni cuní-nsi quida vùù-nsí nsidanicuú tiempu.

¹⁹ Ñàyùcàndùá, sacúndáhvî nùù-nsiá ñà-nì cácan tàhvì cuáhà-nsiá sàhí sàhà-ñá chicá yàchì cui nasai ndé ndoó-nsiá.

²⁰ Ndiaha gá ndoo-nda ñuhiví quidá Yua-nda Dios, vachi sàhà-ñá nì xitià nùù Stoho-ndà Jesucristu, ñàyùcàndùá nì saquin Yuandiaha-yá iin tratu saa xì nèhivì, te nduámà iin palabra mà nunca nsihi, vachi mate ní xihì Jesucristu, nì natiacu-yà nì quida Yuamánì-yá, te nì sàà-yà nì sàcùnduu-ya Pastor ndiaha xi-nda. ²¹ Te

vichi cahnú gà Dios ni sàà-nsià nìhìtáhvì-nsiá nsidanicuú ñà-vàha xi-ya sàhà-ñá cui quida-nsia cumplir ñà-nduá cuní-yà quida-nda; vàchi nú ni nácuàhandee ini-yàndó (xì poder ndiaha) xí Jesucristu, dandu vátùni quida ndisa-nda ñà-nduá cudî ini-yà sàhà-xí. ¡Ansivéhé cahnú-yá nicanicuahàn! Amén.

²² Yùhù sacúndáhvî nùù-nsiá, ñánì, màsà cúdúchí inì-nsia sàhà conseju tii sàni tiai nùù-nsiá yohó, vàchi iin ùi-ni palabra nduá.

²³ Cunaha-nsiá, sàni quee ñani-ndà Timoteo vehècàa. Te nú ni quésáa yàchi-nè ndé ié` yohó, dandu cutnahá-nsí sàà-nsi ndé ndoó-nsiá.

²⁴ Cásàhúì xì nsidaa ana idónuu nùù-nsiá, cachi-nsià xì-né. Te cásàhú stnái xì nsidaa gà nèhivì xí Dios. Daaní, nècuàchì ladu Italia cutnahá-xì yohó, cásàhú stná-nè xì-nsiá.

²⁵ Te nsidaa-nsiá, ni cúcúmí cuáhà-nsiá gracia xi-ya. Sà-íá.

Ley saa ni nacao Jesucristu
New Testament in Mixtec, Southern Puebla
(MX:mit:Mixtec, Southern Puebla)

copyright © 1978 Wycliffe Bible Translators, Inc.

Language: Mixtec, Southern Puebla

Translation by: Wycliffe Bible Translators, Inc.

Mixteco, Sur de Puebla [mit], Mexico

Copyright Information

© 1978, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Southern Puebla

© 1978, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

a5d5d5cd-4240-5e2e-8a5d-f08f5c4f964a